

Romanos

¹ Høøch hädaa nocy njahby, høøch Pablohajpä. Høøchä Jesucristo xyajtuumb nebiä moonsän. Hamuumdu'jóothøchä miädia'agy jaduñ nyajtuunä. Dióshøch jaduñ xpiädaac coöch ndúnät apóstol. Cooch jaduñ nduñ apóstol, je'eduhñ ñänøømby coöchä Dios xwyiinguejxy coöchä miädia'agy nmäwädjätät ja'a yHuungcøxpä, coo hajxy yaa hoy xñähho'túutäm.

² Jéquiänä Dios jaduñ miänaañ cooc ja'a yHuung häna-jty yaa quiexa'añ hädaa yaabä naaxwiin. Jim jaduñ myiñ cujaay maa ja'a Diosmädia'aguiän. Ja'a jäya'ayä Diosmädia'agy hajxy jecy yajwá'xäbä, jaaya'ayhajxy jaduñ jecy cujahy. ³ Ja'a Jesucristo ja'a Dios jaduñ yHuung-hajpy, ja'a hajxy nWiindsøñhájätämbä. Jäya'ayhajt je'e hädaa yaabä naaxwiin neby højtshájätäm. Ja'a rey David yhap yhoc hänajty je'e. ⁴ Y coo ja'a Jesucristo yho'cy, mänit jiuypiojtägajch ja'a yhEspírituhaam. Coo jaduñ jiuypiojtägajch, jaduñ yajnajuø'øy coo je'e ja'a Dios yHuunghadyii, coo møcmäjaa jiaanč tehñ miøødä, coo ja'a Dioshespíritu jiaanč tehñ miøødä.

⁵ Coo ja'a Jesucristo hajxy xñähho'túutäm, coo jiuypiojtägajch, páadyhøchä Dios tøø xquiexy wiinduhmyhagajpt mädia'agy-yajwa'xpä ja'a Jesucristocøxpä, weenä jäya'ayä Diosmädia'agy hajxy miäböcy, ween hajxy hoy yajtuñ, weenä Jesucristo hajxy jaduñ wyiingudsähgø'øy. Coochä Dios jaduñ tøø xquiexy, yajcähxø'py je'eduhñ coöch jaduñ xquiumay. ⁶ Møød mijtsä Dios xyajnähdi-jpä coo ja'a Jesucristo miädia'agy hajxy mbanócxäbät, mijts jim hijpä maa ja'a cajpt jaduñ xiøhatiän Roma.

⁷ Mijts hädaa nocy nyajnäjaayøøby, pønjataiä Dios yaghi-jpy quiø'øjooty jim̄ Roma. Jaaya'ay mijts jaduħñ xya-nähdiĵ coo ja'a miädia'agy hajxy mmäbøĵcät. Xjiaančh tehñ choĵp mijts jaaya'ay jaduħñ. Ween mijtsä hoyhajtä weenhajt xmio'oy møødä yHuung Jesucristo, ja'a hajxy nWiindsønħájtämbä. Ja'a Dios hajxy nDeedyhájtam.

⁸ Jayøĵphøchä Dios Dioscujú'uyäp nmo'oy. Coo ja'a Dioscujú'uyäp hajxy jaduħñ nyéĵcäm, mänitä Jesucristo hajxy jaduħñ xñähgapxtúutäm. Wiinduhmyhagajptä mä-dia'agy wiädity cooc mijtsä Diosmädia'agy hoy mjaančh tehñ miäböcy nägøxiä. Páadyhøchä Dioscujú'uyäp nyecy. ⁹ Ñajuøøbiä Dios cooçh tøy nmädia'agy cooçh nmäna'añ coo mijts homiänaaja njahmiech cooçhä Dios naxy nba'ya'axy. Hamuumdu'jóothøchä Dios nmøød-tuñ cooçhä miädia'agy nyajwa'xä ja'a yHuungcøxpä. ¹⁰ Mayhóoc-høch jim̄ tøø nja nõcxa'añ maa mijtsän. Jadúħñhøchä Dios nja wi'i ñäma'ay cooçh jim̄ xyajnöcxät. Weħñdä jaduħñ miänáannät. ¹¹ Páadyhøch jim̄ nja wi'i ñøcxa'añ maa mijtsän, jaduħñ mijts hoy nbuhbédät ja'a Dioshespíritucøxpä, jaduħñä Diosmädia'agy hajxy maas hoy mmäbøĵgät. ¹² Coo ja'a Diosmädia'agy hajxy näguipxy nmäbøĵcäm, páadyhøch jim̄ nja wi'i ñøcxa'añ maa mijtsän, jaduħñ hajxy hoy hamiñ haxøpy nnijioot-capxmøcpøĵcämät.

¹³ Mägu'ughajpädøĵc, jadúħñhøch nja wi'i miäna'añ cooçh jim̄ nja wi'i ñøcxa'añ maa mijtsän, cáböch jaduħñ nnä'a yajnäbaadø'oy. Páadyhøch jim̄ nja wi'i ñøcxa'añ, chóĵpiøchä njoot jaduħñ coo hajxy mjaac mayø'øwät maa ja'a Diosmädia'agy hajxy mmäbøquiän, nebiä mäbøĵpädøĵc-hajxy tøø miayø'øyän wiingtuumjaty, majátyhøchä Diosmädia'agy tøø nyajwa'xiän. ¹⁴ Jadúħñhøchä Dios xwyiinguejxy cooçhä miädia'agy nyajwá'xät ja'a yHuungcøxpä

wiinduhmyhagajpt majatiä jäya'ayhajxy griegohaam miädia'aguiän, mөөд majatiä jäya'ayhajxy griegohaam quia'a mädia'aguiän. Jadúhnhöch tөө xwyiinguejxpä coochä jäya'ay jaduһn nägөxiä nyajwiingapxө'өwät, hoy hajxy jia һөxpөquiä, hoy hajxy quia'a jagä һөxpөquiä. ¹⁵ Páadyhöch jim nja wi'i ñөcxaambä Roma maa mijtsän, jimhöchä jäya'ayä Diosmädia'agy nyajwiingapxө'өwaambä.

¹⁶ Hiχ, cáböchä Diosmädia'agy nmädsähdiuñ ja'a Jesucristocөxpä, je'eguiөxpä coo jäya'ayhajxy nägөxiä piäda'aga'añii hawa'adstuum ja'a Dios miäjaahaam, pөnjatiä Diosmädia'agy mäböjp ja'a Jesucristocөxpä. Hөjts judíos, hөjts ja'a Diosmädia'agy jayөjp nmädoodsöһn. Hөχhaamä jäya'ayhajxy jiaac mädooyy, ja'a hajxy ca'a judiөspä. ¹⁷ Ja'a miädia'agyhaamä Dios hajxy xyajwiinjuөyyäm coo piäda'aga'añ hawa'adstuum pөnjaty jaduһn mäbögaamb coo ja'a Dios yajtөjiada'añ waambaty tөө quiapxy tөө miädia'agy. Pөñ jaduһn ca'a mäbögaamb, cab je'e piäda'aga'añii hawa'adstuum. Jaduһn jim myiñ cujaay maa ja'a Diosmädia'aguiän: “Pөnjaty jaduһn mäbögaamb coo ja'a Dios yajtөjiada'añ waambaty tөө quiapxy tөө miädia'agy, je'e ja'a Dios jaduһn piäda'agaambы hawa'adstuum. Je'e jaduһn nөcxaamb Dioswiinduum.”

¹⁸ Hoy piөñä jaduһn ñajuө'өy coo ja'a Dios tsajpootypä yajcumädowa'añ pөnjatiä Dios ca'a wiingudsähgөөby, mөөд pөnjatiä jioot ca'a tsojp coo ja'a Dios wyiingudsähgө'өwө'өjät wiinghäna'c. Paadiä jioothajxy jaduһn quia'a tsocy je'eguiөxpä coo hajxy haxөөг jiaac jatcө'өwa'añ. ¹⁹ Cabä төyhajtpä hajxy chocy, hoyyä Dios hajxy tөө jia yajwiinjuө'өyii nebiatiä Dios jaduһn wyiinmahñdyhaty. ²⁰ Jéquiänä Dios cөxiä yhädiuuñ, mөөд yө'ө tsajt, mөөд hädaa yaabä naaxwiin,

cøxiä. Coo hajxy jaduhñ nhíjxäm tijaty ja'a Dios jaduhñ tøø yhädiuñ, paadiä tøyhajtpä hajxy nmøødhájtäm coo ja'a Dios møcmäjaa miøødä homiänaajä, møød coo cøxiä wiinä yhane'emy, hoyyä Dios hajxy nga'a jagä híjxäm. Jaduhñä tøyhajtpä hajxy nmøødhájtäm coo ja'a Dios hajxy nwiingudsähgøøyyämät. Cab jaduhñ pøn hawiinmats miäná'anät cooc tyijy hajxy quia'a najuø'øy coo ja'a Dios jyijjä. ²¹ Ja'a häna'c-hajxy jaduhñ haxøøg jatcøøbiä, cabä Dios hajxy wyiingudsähgø'øy, hoy hajxy jaduhñ jia najuø'øy coo ja'a Dios jyijjä. Ni cabä Dios Dioscujú'uyäp hajxy mio'oy. Paadiä wyiinmahñdyhajxy quia'a tsoobaada'añ. Y paady hajxy tehñgajnä wyiinmahñdyhada'añ haxøøg. Cabä howyiinmahñdy hajxy hoy miøødhadaañä. ²² Hoy hajxy jia nibiäda'agyii nebiä jaançh tehñ jiajpän, cab hajxy tii ñä'ägädä jaty. ²³ Ja'a Dios, møj jaançh je'e. Hoy miänaajä yhity. Cab jaduhñ mänaa yho'ogy. Pero cabä haxøøghäna'cä Dios hajxy wyiingudsähgø'øwa'añ. Jäya'ayhahädiuunnaxy hajxy wyiingudsähgøøby, hoyyä jäya'ayhajxy jia ho'ogy; møødä muuxyhahädiuunnaxy hajxy wyiingudsähgøøbiä, møødä tsahñdyhahädiuunnaxy, møødä animalhahädiuunnaxy ja'a hamädaaxtecypiä.

²⁴ Paady, cabä Dios waamb miäna'anaañä, weenä jäya'ayhajxy haxøøg wyiinmahñdyhaty nebiä jioot hajxy choquiän, coo hajxy cøxypänejpä ween ñidiuñii hochähdiuunnä, ²⁵ je'eguiøxpä coo ja'a tøyhajtpä hajxy tøø quia'a mäböcy ja'a Dioscøxpä. Ja'a hønnda'agymiädi-a'agy hajxy jaduhñ miäböjpy. Cabä Dios hajxy wyiingudsähgø'øy. Jue'e hajxy wyiingudsähgøøby, tijatiä Dios yaa tøø quiunuu'xy hädaa yaabä naaxwiin. Pero, hahixøøby coo ja'a Dios hajxy nwiingudsähgøøyyämät homiänaajä. Tøyhajt jaduhñ.

²⁶ Coo häna'cä Dios hajxy quia'a wiingudsähgø'øwa'añ, paadiä Dios waamb quia'a mäna'ana'añ, ween hajxy hoçhähdiiuunnä ñidiuunänä. Høxtä to'oxiøjpaadyhajxy jaduñ jiatcø'øy. Cabä ñihyhap hajxy näje'e miøødtsäna'awaannä; quipxyjatiä to'oxiøjc-hajxy cøxypänejpä ñidiuñii hoçhähdiiuunnä. ²⁷ Jaanä jaduñä ya'adiøjc-hajxy näje'ebä, cabä tio'oxiøjc hajxy miøødtsäna'awaannä. Quipxyjatiä ya'adiøjc-hajxy ñimiøødtsäna'awa'añii. Hoçhähdiiuunnä hajxy jaduñ ñidiuñii cøxypänejpä. Coo hajxy jaduñ jiatcø'øy, paady hajxy quia'a niyaghoyø'øyii maa ja'a ñi'xcøxp maa ja'a quiopcøxphajxiän, møød maa ja'a wiinmahñdycøxphajxiän.

²⁸ Coo ja'a haxøøghäna'cä Dios hajxy jaduñ quia'a wiingudsähgø'øwa'añ, paady hajxy ñajtshixø'øyii ja'a Diósäm. Ja'a Dios, cab jaduñ waamb miäna'anaannä, weenä yhaxøøgwiinmahñdy hajxy tiuñ, ween hajxy jaduñ jiaac jatcø'øy haxøøg. ²⁹ Madiu'u hajxy haxøøg jiatcø'øy cøxypänejpä. Miøødtsänaabiä cuhhiñdo'oxiøjc hajxy. Møødä jäya'ajie'e hajxy yhadsocy. Cab hajxy hojiäwø'øy pø jimä miägu'ughajpähajxy cøxiä wiinä miøødä. Høxtä niyaghó'cäp hajxy. Nimiäd-siphájtäp hajxy. Høhndaacp hajxy. Niñähøønóyyäp hajxy. ³⁰ Niwyiingapxéjtäp hajxy. Møødä Dios hajxy miähanhaty. Nibiéjxäp hajxy. Yajcumayaamb hajxy. Hawiinjemybiä haxøøgwiinmahñdy hajxy yajcojpy. Cabä tiaj, cabä tieediä miädia'agy hajxy miäböjcä. ³¹ Jaançh tehñ quiuhxex hajxy. Ni ja'a yhamdsoo mädia'agy hajxy quia'a cudiuna'añ. Cab hajxy pøn chocy miee'xy. Ni cab hajxy pøn miee'xa'añ. Cabä hojiot hajxy ñä'ägädä møødä. ³² Ñajuøøby hajxy jaduñ coo ja'a Dios tøø yhane'emy coo hajxy haxøøgjaty quia'a jatcø'øwät nébiøch naamñä tøø nmädia'aguiän. Jaanä

jaduhñ hajxy ñajuøøbiä, pøn jaduhñ haxøøg jatcøøby, quiumädownaamby hajxy je'e tehngajnä. Pero nägø'ø nädecypiä hajxy jaduhñ jiatcø'øy, hoy hajxy jaduhñ jia najuø'øy. Høxtä xoonäacp hajxy jaduhñ coo wiinghä-na'c-hajxy jaduhñ haxøøg piajatcøøbiä.

2

¹⁻³ Nnajuøøyyäm hajxy jaduhñ coo jaduhñ yhahixø'øy coo ja'a Dios hajxy nägøxiä xyajcumädóowämät je'eguiøxpä coo hajxy nägøxiä haxøøg njatcøøyyäm. Cab jaduhñ yhahixø'øy coo højtsä jäya'ay nnänóømämät coo hajxy hoy quia'a hity, coo hajxy ween quiumädoy. Caj pues, haa ca'a, jaduhñ højts haxøøg nbajatcøøyyämbä. Hix, ni pøn jaduhñ hahixøøby quia'a mäná'anät cooc tyijy hoy tiehm yhity. Paady jaduhñ yhahixø'øy coo ja'a Dios hajxy nägøxiä xyajcumädóowämät, je'eguiøxpä coo hajxy hoy nga'a hoyhidáañäm. ⁴ Pero hojiootä Dios jiaančh tehñ miøød, paady hajxy xquia'a tsoj tsaächtiuunäm. Chojpiä jioot jaduhñ coo howyiinmahñdy hajxy nbadu'ubójcänät, coo ja'a nhaxøøgwiinmahñdy hajxy nnajtshixøøyyänät. ⁵ Pero jii jäya'ayhajxy näje'e, jaančh tehñ xiexä quiopcä tiaatsc-hajxy. Cabä yhaxøøgwiinmahñdy hajxy ñajtshixø'øwa'añ. Y coo hajxy jaduhñ tehngajnä quia'a mábógät, mänit hajxy hänäjty hanaxiä chaačhpøga'añ coo yhabáadät coo ja'a Dios ja'a cahwiindøyhäna'c hänäjty chaaächtiuna'añ. ⁶⁻¹⁰ Pønä jioot nägø'ø nädecypiä tsojp coo hoy yhidät, pønä jioot pädaacp coo jim ñócxät Dioswiinduum, coo ja'a hoyhajtä weenhajt jim piáadät, coo jim quiumayóøjät ja'a Diósäm, pues je'edsä Dios jim yajnøcxaamby. Mio'owaambiä Dios je'e ja'a hoyhajtä weenhajt. Quiumayaambiä Dios jaduhñ. Yaghidaambiä Dios je'e jootcujc homiänaajä, hopiønä, hoy jia judíosä, hoy quia'a

jagä judíosä. Pero hoyhoyyä Dios chaächtiuna'añ pøn haxøøg jatcøøby, pønä Diosmädia'agy ca'a cudiunaamb, pøn ca'a yajmägäpax ca'a yaghane'emaamb waambatiä Dios hajxy jaduhñ xjia hanéhmäm. Hopiønä jaduhñ chaaçhpøga'añ, pønjaty jaduhñ haxøøg jatcøøby, hoy hajxy jia judíospä, hoy hajxy quia'a jagä judíospä.

¹¹ Hiç, cabä Dios miøjpäda'agy pø mjudío miiçh, pø caj. Je'e yajcopcøøby pø mhoyhäna'c, pø caj. ¹²⁻¹⁵ Højts judíosahjäpä, jequiän højtsä Dios xyhanehmy neby højts hoy nguhdujthädät. Mänitä Moisés ja'a mädia'agy jaduhñ quiujahy nebiaty højts hoy nguhdujthädät. Hoorä, ja'a häna'c-hajxy ca'a judíospä, cabä mädia'agy hajxy miädoyyä nebiä Moisés jecy quiujahyyän. Pero hoy hajxy quia'a jagä mädoyyä, coo hajxy hamdsoojoot hoy quiudiünät nebiä Dios jioot jia tsoquiän, cähxø'øgäp jaduhñ coo hajxy yhawáanäxä ja'a Diósäm ja'a wyiinmahñdyhaamhajxy. Jaduhñ hajxy hamdsoo ñajuø'øy pø hoy hajxy quiudiuñ, pø caj. Jaduhñ hajxy yajtuungpaady néjjiäm hajxy häxøpy tøø miädoy ja'a mädia'agy ja'a Moisés jecy quiujahyyäbä. Y coo hajxy hoy quia'a cudiünät neby hajxy ñajuø'øy ja'a wyiinmahñdyhaamhajxy, mänit hajxy quiumädowa'añ. Jaanä jaduhñ højtspä, højts judíospä, coo højts nga'a cudiünät neby højtsä Dios jecy xyhanehmiän, nebiä Moisés ja'a mädia'agy jecy quiujahyyän, jaduhñ højts ngumädowaambä. Hiç, pøn jaduhñ cudiuumb nebiä Dios yhane'emiän, je'e ja'a Dios piäda'agaamby hawa'adstuum, hoyyä mädia'agy tøø quia'a jagä mädoyyä nebiä Moisés jecy quiujahyyän. Pero pøn jaduhñ ca'a cudiuumb, hoyyä mädia'agy tøø jia mädoyyä nebiä Moisés jecy quiujahyyän, cab je'eduhñ hawa'adstuum piäda'aga'añii ja'a Diósäm. Jaduhñds je'e, nägøxiä ja'a cahwiindøyhäna'c-hajxy quiumädowa'añ, hoy hajxy jia judíospä, hoy hajxy quia'a jagä judíospä. ¹⁶ Mänit hajxy

jaduhñ quiumädowa'añ coo ja'a Dios ja'a Jesucristo häna-jty yaa quiejxtägatsa'añ hädaa yaabä naaxwiin. Mänitä jäya'ayhajxy yhixa'añii ja'a Jesucristäm nebiaty hajxy hänajty yaa tøø jiatcø'øy. Mänit hajxy yagjahmiejt-sta'aga'añii nebiaty hajxy hänajty tøø wyiinmahñdyhaty hamee'ch. Jaduhñä Diosmädia'agy miäna'añ ja'a Jesucristocøxpä, ja'açh nyajwa'xypä.

¹⁷ Højts judíoshajpä, naxy højts nniguiumayii coo højts njudíoshaty, coo højtsä mädia'agy nmäböcy ja'a Moisés jecy quiujáhyyäbä. Jaduhñ højts nniguiumáayyäbä coo højtsä Dios tøyhajt xquiu'ughaty, højtsyähajtiä, højts judíoshajpä. ¹⁸ Nnajuøøby højts jaduhñ nebiatiä Dios jioot chocy coo højts nhoyhäna'c-hádät. Y ja'a mädi-a'agy ja'a Moisés jecy quiujáhyyäbä, je'e højts jaduhñ xyhawáanäp neby højts nwiimbíwät tii hoy tii mäbaad. ¹⁹⁻²⁰ Niyhajuøøyyäp højts coo højts häna'c hoy nyaj-nähixø'øwa'añ, ja'a häna'cä Diosmädia'agy hajxy ca'a jajpä ca'a najuøøbiä. Jim højtsä tøyhajt nbaady maa ja'a mädia'aguiän, ja'a Moisés jecy quiujáhyyäbä. ²¹ Hoorä, coo højts häna'c jaduhñ nyaj-nähixø'øy ja'a Diosmädi-a'agy, hahixøøby jaduhñ coo højtsä Diosmädia'agy hoy ngudiúnät. Cábøçhä nmägunaaxhajxy näje'e hoy quiudi-uñ. Y coo højts häna'c nmägapxy nhane'emy coo hajxy quia'a méedsät, hahixøøby jaduhñ coo højts nga'a mée't-spät. Jaduhñhøçhä nmägunaaxhajxy näje'e jiatcø'øy. ²² Y coo højts häna'c nmägapxy nhane'emy coo wiinghä-na'cä tio'oxiøjc hajxy quia'a møødtsänáayyät, cab jaduhñ yhahixø'øy coo højts jaduhñ njatcøøbiät. Jaduhñhøçhä nmägunaaxhajxy näje'e jiatcø'øy. Cab højts quepychech naaxpoch nwiingudsähgø'øy. Pero cab jaduhñ yhahixø'øy coo højts xädø'øñ nméedsät tsajtøgooty maa ja'a quepychech naaxpoch yhitiän. Jaduhñhøçhä nmägunaaxhajxy näje'e jiatcø'øy. ²³ Niguiumáayyäp højts

jaduh_n coo hõjtsä mädia'agy nmäbøcy ja'a Moisés jecy quiujáhyyäbä. Pero näje'ečhä nmägunaaxhajxy, cab hajxy hoy quiuidiuñ. Jaduh_n hajxy yajcähxø'ogy coo ja'a Dios hajxy tøyhajt quia'a wiingudsähgø'oy. ²⁴Jaduh_n jim myiñ cujaay maa ja'a Diosmädia'aguiän: “mijts judíos hajpä, coo ja'a Diosmädia'agy hajxy hoy mga'a cudiuñ, paadiä Dios haxøgjtaty ñähojyii ja'a häna'c-hajxy ca'a judíospä.” Tøyhajt jaduh_n.

²⁵ Hõjts, judíos hõjts nmäminø'oy nmäga'awø'oy. Mänit hõjtsä Dios xquiumáyät coo hõjtsä mädia'agy hoy ngudiúnät, ja'a Moisés jecy quiujáhyyäbä. Pero coo hõjts jaduh_n hoy nga'a cudiúnät, cab hõjtsä Dios jaduh_n xquiumaya'añ. ²⁶ Hoorä, ja'a häna'c-hajxy ca'a judíospä, coo hajxy hoy quiuidiúnät nebiä Dios yhane'emiän, mänit hajxy quiumaya'añii ja'a Diósäm. ²⁷ Näje'ečhä nmägunaaxhajxy, cab hajxy hoy quiuidiuñ nebiä Dios yhane'emiän, hoy hajxy judíos jia mäminø'oy jia mäga'awø'oy, hoyyä mädia'agy hajxy jia mädooyä, ja'a Moisés jecy quiujáhyyäbä. Je'ehajxy mäbøcypä ca'a cumayáañäp ja'a Diósäm. ²⁸ Pønjaty hoy cudiuumb nebiä Dios yhane'emiän, je'edsä Dios quiu'ughajpy, hoy hajxy judíos quia'a jagä mäminø'oy quia'a jagä mäga'awø'oy, hoyyä hijxtahnd hajxy quia'a jagä mөөdä maa ja'a ñi'xcøxphajxiän neby hõjts judíos nmөөdän. ²⁹ Hix, coo pøn hoy quiuidiúnät hamuumdu'joot nebiä Dios choquiän, mänit hajxy quiu'ughada'añii ja'a Diósäm, hoyyä judíoshajxy näje'e quia'a ja mäna'añ cooc tyijy hajxy jaduh_n quia'a cu'ughadyii ja'a Diósäm. Hix, quiu-maabiä Dios jaduh_n pøn jaduh_n cudiuumb hamuumdu'joot.

3

¹⁻² Xchoobáatäp hõjts jaduh_n madiu'u coo hõjts judíos

nmäminø'øy nmäga'awø'øy, coo højtsä hijxtahnd nyajpäda'agy maa højts nni'xcøxpän, ja'a jaduhn yajcähxø'pä coo højtsä Dios xquiu'ughaty. Tøyhajt jaduhn. Haa ca'a, Dios højts nhap ndeedy jecy xyajcø'ødägøøyyä ja'a mädia'agy ja'a Moisés jecy quiujähyyäbä. Mänit hajxy ñämaayyä ja'a Diósäm coog hajxy hänajty quiu'ughada'añii.
³⁻⁴ Y je'enä højtsä Dios xquiu'ughatyñä neby højts jecy xyajwiinwaanøøyyän, hoy højts nhap ndeedy nämay hoy quia'a jagä cudiuuñ neby hajxy hänajty tøø yhane'emyijän ja'a Diósäm. Tøyhajt jaduhn coo ja'a Dios tiømiädi-a'agy. Cabä Dios mänaa yhöhnda'agy, hoy hajxy nägøxiä cu nja mänáañäm cooc tyijy ja'a Dios quia'a yajtøjiaty waambaty hajxy tøø xyajwiinwaanøøyyäm. Jaduhn jim myiñ cujaay maa ja'a Diosmädia'aguiän:

Diosteedy, hopiønä jaduhn ñajuø'øy coo miičh myajtøjiaty waambaty højts miičh tøø xyajwiinwaanøø'y.
 Coo miičh pøn xñäxø'øwø'øwät cooc tyijy miičh jaduhn mga'a yajtøjiaty waambaty miičh tøø mmädia'agy, cähxø'øgaamb jaduhn coo je'e yhöhnda'agy, ja'a miičh jaduhn xñäxø'øwøøbiä.

⁵ Jaančh tehñ yhoyyä Dios yhity. Pero højts, cab højts hoy nnä'ägä híjtäm. Tøyhajt jaduhn. Paadiä, cähxø'p jaduhn coo ja'a Dios jiaančh tehñ hoyyä. Hiç, coo højts häxøpy nhíjtäm hoy, cab jaduhn häxøpy quiähxø'øgy coo ja'a Dios jaduhn hoy jiaančh tehñ yhity. Pero jaduhnä jäya'ayhajxy näje'e miäna'añ cooc tyijy ja'a Dios howyiinmahñdy quia'a møødä, je'eguiøxpä coo hajxy xyajcumädoówáañäm. ⁶ Pero hahixøøby jaduhn coo ja'a Dios hajxy xyajcumädoówämät. Haa ca'a, coo ja'a Dios häxøpy hoy quia'a hity, cabä cuhdujt häxøpy miøødä coo hajxy jaduhn xyajcumädoówämät.

⁷ Hoyyä jäya'ayhajxy näje'e jia mäna'añ cooc tyijy ja'a Dios quia'a yajtøjiaty waambaty tøø quiapxy

tøø miädia'agy, yajnajuøøby jaduħn coo ja'a Dios tøy-hajt mänaa quia'a høhnda'agy. Jaduħnä jäya'ayhajxy nägøxiä ñajuø'øwa'añ coo jaduħn yhäxixø'øy coo ja'a Dios hajxy nwiingudsähgøøyyämät. Pero coo pønä Dios jaduħn ñänómät cooc tyjy quia'a yajtøjiaty waambaty tøø quiapxy tøø miädia'agy, häxixøøby jaduħn coo je'e quiumädówät. ⁸ Näje'ečhä jäya'ayhajxy xñähøønø'øy cóogøch tyjy nmäna'añ cooc tyjy jaduħn yhäxixø'øy coo hajxy häxøøg njatcøøyyämät, jadúhñäc tyjy maas hoy quiähxø'øga'añ coo ja'a Dios jiaanč tehñ yhooyä. Ja'a hänä'c-høch hajxy jaduħn xñähøønøøbiä, høhndaacp hajxy jaduħn. Häxixøøby jaduħn coo hajxy quiumädówät.

⁹ Jaanä jaduħn højts judíospä, cab højtsä Diosmädia'agy maas hoy ngudiuñ quejee ja'a häna'c-hajxy ca'a judíospä. Haa ca'a, tøøch nhuuc mänaambä coo hajxy jaduħn hoy nga'a nä'ägä hojiäya'ayhajtäm, coo ni pønä Diosmädia'agy hoy quia'a nä'ägä cudiuñ, ni højts judíos, ni ja'a häna'c-hajxy ca'a judíospä. Hamdsoojoot hajxy jaduħn hoy nga'a jäya'ayhajtäm. ¹⁰ Jaduħn jim myiñ cujaay maa ja'a Diosmädia'aguiän:

Ni pøn hoy quia'a wädity.

¹¹ Ni pøn jaduħn quia'a wiinjuø'øwa'añ nebiä Dios wyiin-mahñdyhatiän.

Ni pønä jioot quia'a päda'agy maa ja'a Diosän.

¹² Tøø ja'a jäya'ayä Diosmädia'agy hajxy nägøxiä ñajt-shixøøñä.

Cøjnøø cøjtu'u hajxy tøø piadu'ubøjñä.

Haxøøg hajxy jiäya'ayhajnä nägøxiä.

¹³ Jaanč tehñ yhäxøøg hajxy quiapxy miädia'agy.

Jaduħnä yhaawhajxy tiocxuugy nebiä ho'oguiäya'ajiut tiocxuuguiän, ja'a tøø yhawá'ächäbä.

Jaančh teh̄m yhøhndaacp hajxy. Jaduhñä haxøøgpä hajxy yaghity yhaawjooty nebiä haxøøgtsahñdy-haawän.

Jaančh teh̄m miägäp̄xpoj̄p hajxy.

¹⁴ Jaančh teh̄m quiapxtägooby hajxy hoñejpiä nebiä joot hajxy yajmädsoquiän. Jaančh teh̄m yhaxøøg hajxy ñiñänømyii.

¹⁵ Jaančh teh̄m piaquiä jootma'ad hajxy piaadyii, mäniitä miäya'adiøjc hajxy nøcx̄y yagho'oga'añ.

¹⁶ Jaančh teh̄m chipyajpädø'p hajxy majaty hajxy wiädity. Chaächtiuum̄biä cu'ug hajxy jaduhñ.

¹⁷ Jaančh teh̄m chiptsojp hajxy.

¹⁸ Cab hajxy tiajy miay pø yajcumädowáañäbä Dios hajxy.

¹⁹ Jaduhñds je'e, yajcumädowaañbiä Dios ja'a jäya'ay nägøxiä, pønä miädia'agy hoy ca'a cudiuñäp, møød højts judíos, møødä häna'c-hajxy ca'a judíospä. Højts judíos, højtsä poj̄pä nmaas møød, je'eguiøxpä coo højtsä Dios ja'a nhapä ndeedy jecy xjia hanehmä coo hajxy haxøøgjaty quia'a jatcø'øwät nébiøch naamñä tøø ngujaayän. Pero cab højts jaduhñ nnä'ägädä cudiuna'añ. ²⁰ Jéquiänä Dios ja'a Moisés yhanehm̄y coo ja'a miädia'agy quiujáhyyäxät. Jaduhñ hajxy nnajuøøyyäm coo hajxy nägøxiä hoy nga'a jäya'ayhájtäm. Ni pøn jaduhñ hoy quia'a cudiuna'añ ja'a Diosmädia'agy. Coo ja'a Jesucristo hajxy tøø xñäh-ho'túutäm, paadiä Dios hajxy xpiäda'agáañäm hawa'ad-stuum, caj jie'eguiøxpä cooc tyijy ja'a mädia'agy hajxy hoy ngudiuñäm, ja'a Moisés jecy quiujáhyyäbä.

²¹⁻²⁶ Hoorä, nnajuøøyyäm hajxy jaduhñ coo hajxy nägøxiä haxøøg njatcøøyyäm, mäduhñtiä hajxy yaa nd-sänáayyäm hädaa yaabä naaxwiin, møød højts judíos, møødä häna'c-hajxy ca'a judíospä. Cabä Dios pøn ñä'ägädä cumay. Jaduhñä jäya'ayhajxy näje'e miäna'añ

cooc tyijy hajxy piäda'aga'añii hawa'adstuum coogä jecymiädia'agy hajxy hoy quiudiúnät, ja'a Moisés jecy quiujáhyyäbä. Pero tøø hajxy nhíjxäm coo ni pøn jaduhñ quia'a päda'aga'añii hawa'adstuum. Hoorä, jéquiänä Dios wyiinmaayy coo ja'a yHuung hänajty yaa quiexa'añ maa højtshájtäm. Mayhajtä Dios hänajty tiunaamby maa højtshájtäm. Jaduhñ hajxy hänajty xpiäda'agáanäm hawa'adstuum. Jim jaduhñ myiñ cujaay maa ja'a jecymiädia'aguian, ja'a Moisés jecy quiujáhyyäbä. Pero cabä jecyjiäya'ayhajxy hänajty wyiinjuø'øy. Hojiootä Dios miøød coo ja'a jecyjiäya'ayhajxy quia'a pädaacä haxøøgtuum, hoy hänajty jia hawiinmatsä coo hajxy jim cu piädaacä, je'eguiøxpä coo hajxy hänajty haxøøg jiatcø'øy. Paadiä Dios ja'a yHuung ñähdujcy, jaduhñä jäya'ayä piojpä quiädieey hajxy ñähwá'adsät. Jaduhñ quiähxø'øgy coo ja'a Jesucristo ja'a jecyjiäya'ay yajñähwaach ja'a piojpä quiädieeyhajxy. Høxtä jäda'anäbaadyñä ja'a Dios hajxy xyajwiinjuøyyäm neby hajxy xpiädáacäm hawa'adstuum. Jaanä jaduhñ hajxy xyajwiinjuøyyämbä coo hajxy piäda'aga'añii haxøøgtuum pønjaty haxøøg jatcøøby jäda'ahaty. Paadiä Dios ja'a yHuung ñähdujcy, ja'a Jesucristo, neby hajxy jaduhñ xñähho'túutämät. Y coo hajxy jaduhñ nmäbøjcämät coo ja'a Jesucristo hajxy tøø xjiaanč ñähho'túutäm, jaduhñä Dios ja'a nbojpä ngädieey hajxy xyajñähwáatsäm, jaduhñ hajxy xpiädáacäm hawa'adstuum, hopiønä, møød højts judíos, näguipxy møødä häna'c-hajxy ca'a judiøspä. Mayhajtä Dios jaduhñ tiuun maa højtshájtäm coo hajxy jaduhñ xpiädáacäm hawa'adstuum.

²⁷⁻²⁸ Cab jaduhñ yhawiinmatsä coo hajxy hamdsoo nniguiumáayyämät. Hix, coo hajxy nmäbøjcämät coo ja'a Jesucristo hajxy tøø xñähho'túutäm, paadiä Dios hajxy xpiäda'agáanäm hawa'adstuum, hoy hajxy nga'a jagä

panócxäm nebiä Moisés jecy quiujahyyän. Coo ja'a Dios hajxy häxöpy xpiädaacäm hawa'adstuum je'eguiøxpä coo ja'a jecymiädia'agy hajxy ngudiúunäm, ja'a Moisés jecy quiujáhyyäbä, mänit hajxy máböcy cu nniguiumaáyyäm hamdsoo. Pero caj pøñ jaduñ piäda'aga'añii hawa'adstuum hamdsoohaam.

²⁹⁻³⁰ Tu'uquiä Dios jaduñ. Tu'cuhdujtä Dios hajxy xyhíjxäm nägøxiä, møød højts judíos, møødä häna'c-hajxy ca'a judíospä. Tøyhajt jaduñ. Coo hajxy nägøxiä nmäbójcämät coo ja'a Jesucristo hajxy tøø xñähho'túutäm, paadiä Dios hajxy jim xpiädaacämät hawa'adstuum nägøxiä. ³¹ Pero cáböch nmäna'ana'añ coo ja'a jecymiädia'agy quia'a tøyä, ja'a Moisés jecy quiujáhyyäbä, hoy hajxy nja wiinjuóyyänä coo ja'a Jesucristo hajxy xpiädaacäm hawa'adstuum mänaa hajxy tøø xñähho'túutäm. Hiç, maas hoy hajxy jaduñ nwiinjuóyyänä coo ja'a jecymiädia'agy jaduñ jiaanç tøyä, ja'a Moisés jecy quiujáhyyäbä. Coo hajxy nmäbójcäm coo ja'a Jesucristo hajxy tøø xñähho'túutäm, paady hajxy xpiädaacäm hawa'adstuum, caj jie'eguiøxpä cooc tyijy ja'a jecymiädia'agy hajxy jaduñ hoy ngudiúunäm. Tøø hajxy jaduñ nwiinjuóyyänä coo jaduñ tiøyhajtä.

4

¹ Højts judíos, højtsä Abraham jecy nhaphajt ndeedyhajt. ² Hoyä Abraham hijty jiäya'ayhaty jegyhajty. Hoorä, coo ja'a Dios ja'a Abraham häxöpy tøø piäda'agy hawa'adstuum je'eguiøxpä coo ja'a Abraham hoy jia jäya'ayhajty, mänitä Abraham cu ñiguiumaáyyä. ³ Hiç, paadiä Dios ja'a Abraham piädaacy hawa'adstuum, coo ja'a Abraham ja'a Dios miädia'agy miäböjcä cooc ja'a Dios yajtøjiaty waambaty tøø quiapxy tøø miädia'agy, ca'a jie'eguiøxpä coo ja'a Abraham hoy jiäya'ayhajty.

Jaduhñ jim myiñ cujaay maa ja'a Diosmädia'aguiän. ⁴ Hoorä, ja'a cuduumbädøjc, paady hajxy miäjuyii coo hajxy quiuduñ, cab jaduhñ ñä'ä mayhajtä. Jaduhñ miäbaady nebiä jäya'ayhajxy näje'e wyiinmahñdyhatiän. Yajcumayaamb hajxy ja'a Diósäm, paady hajxy jia wi'i yhojiäya'ayhada'añ. ⁵ Pero pønjaty tøø miäböcy coo ja'a Dios yajtøjiaty waambaty tøø quiapxy tøø miädia'agy, je'edshajxy jaduhñ hawa'adstuum päda'agáañäp. Paady hajxy jim piäda'aga'añii coo hajxy jaduhñ miäböcy, ca'a jie'eguiøxpä coo hajxy hoy jia jäya'ayhaty. Jim hajxy jaduhñ piäda'aga'añii, hoy hajxy haxøøg tøø jia jatcø'øy. Tiummbiä Dios mayhajt jaduhñ. Coo ja'a Dios hajxy häxøpy xpiädáacäm hawa'adstuum je'eguiøxpä cooc tyijy hajxy hoy njäya'ayhajtäm, cab hajxy häxøpy nmánáañäm cooc ja'a Dios mayhajt tiuñ. ⁶ Jaduhñä David jecy miänaañ cooc hajxy jootcujc yhida'añ, pønjaty jaduhñ najuøøby coo ja'a Dios hajxy xpiädáacäm hawa'adstuum ja'a miay-hajthaam, hoy hajxy hänajty haxøøg tøø jia jatcø'øy. Hiç, cabä Dios miøjpäda'agy pø cabä häna'c hänajty hoy tøø jiäya'ayhaty.

⁷⁻⁸ Coo jaduhñ yhabáatnät coo Dios ja'a jäya'ay yajtøyhaj-tyega'añ nebiaty hajxy hänajty tøø quiädieeyän, mänit hajxy jootcujc yhida'añ pønjatiä Dios piädaacy py hawa'adstuum, pønjatiä Dios miee'xyp, pønjatiä piojhajpiä ja'a quiädieeyhajpiä hajxy yajnäh-wáatsäxä, nõmä David jecy miänaañ.

⁹ Jue'e ja'a David jecy ñänøøm cooc hajxy jootcujc yhi-da'añ, pønjatiä Dios piädaacy py hawa'adstuum, hopiønä, møødä judíoshajxy, ja'a Dios quiu'ughajpiä, møødä cajpä judíoshajxy. Je'edshajxy ca'a cu'ughajtäp ja'a Dios. Hiç, jaduhñ myiñ cujaay maa ja'a Diosmädia'aguiän: “Coo ja'a

Abraham ja'a Dios miädia'agy miäbøjcä cooc ja'a Dios mänaa quia'a hõhnda'agy, paady piädaacä hawa'adstuum.”

¹⁰ Hoorä, jaduñä judíos hajxy quiuhdujthaty, yajcircuncidarhajpä ya'adiøjc-hajxy. Jaduhñ miädia'agytiägø'øy coo hijxtahñd hajxy piädáacäxä maa ja'a ñi'xcøxpahjxiän. Hoorä ja'a Abraham, tóøyyäm hänäjty je'e piädáacänä hawa'adstuum, cajnä hijxtahñd hänäjty jaduñ piädáacäxä maa ja'a ñi'xcøxpän. Jaduhñä tøyhajt hajxy nmøødhájtäm coo häna'c-hajxy piäda'agyii hawa'adstuum je'eguiøxpä coo ja'a Dios miädia'agy hajxy miäbøjcä cooc ja'a Dios yajtøjiaty waambaty je'e tøø quiapxy tøø miädia'agy, hoyyä hijxtahñd hajxy quia'a jagä møødä maa ja'a ñi'xcøxpahjxiän. ¹¹ Paadiä Abraham hijxtahñd jaduñ piädáacäxä maa ja'a ñi'xcøxpän, jaduñ yajnajuo'øy coo ja'a Abraham hänäjty tøø piäda'agyii hawa'adstuum. Paady jim piädaacä coo ja'a Dios ja'a miädia'agy hänäjty tøø miäbøjcäxä. Jaduhñä Abraham piädaactsohñä hawa'adstuum, hoyyä hijxtahñd hänäjty jaduñ quia'a jagä pädaacäxänä maa ja'a ñi'xcøxpän. Pønjaty jaduñ mäbøjp nebiä Abraham jecy miäbøjquiän, jaanä jaduñ hajxy yhixáanäbä ja'a Dios nebiä Dios ja'a Abraham jecy yhiixiän, hoy hajxy quia'a jagä judíospä. Cooc hajxy jaduñ nmäbøjcäm nebiä Abraham jecy miäbøjquiän, jaduñ quiähxø'øgy coo ja'a Abraham hajxy nhøjxhájtäm ndecyhájtäm. ¹² Højts judíos hajxy, højtsä Abraham jecy nhaphajt ndeedyhajt. Jaaya'ay jaduñ pädaactsohñä hawa'adstuum je'eguiøxpä coo jaduñ miäbøjcy coo ja'a Dios yajtøjiaty waambaty hänäjty tøø quiapxy tøø miädia'agy. Tøyhajt jaduñ. Højts judíos, jaduñ højts nyajcircuncidarhaty nebiä Abraham jecy yajcircuncidarhajtän. Pero tóøyyämä Abraham ja'a Dios ja'a miädia'agy hänäjty miäbøjcä, cahnä hänäjty yajcircuncidarhaty. Højts judíos, højts

jaduhñ mǎbǒjpä, jaanǎ jaduhñ hǒjts nmǎbǒjpä nebiǎ Abraham jecy miǎbǒjquiǎn. Jaduhñǎ tǒyhajt hajxy nmǒødhǎjtǎm coo hǒjtsǎ Abraham jecy nhǒjxhajty ndecyhajty, coo hǒjts jaduhñ nmǎbǒcy, hǒjts judíos.

¹³ Jéquiǎnǎ Dios ja'a Abraham ñǎmaayy cooc hǎnajty yaa miǎhane'ema'añ hǎdaa yaabǎ naaxwiin nǎguipxy mǒødǎ yhap mǒødǎ yhoc. Ja'a Dios jaduhñ mǎnaan. Paadiǎ Abraham jaduhñ ñǎmaayyǎ je'eguiǒxpǎ coo ja'a Abraham ja'a Dios miǎdia'agy hajxy miǎbǒjcǎ, ca'a jie'eguiǒxpǎ cooc tyijy ja'a Abraham jia cudiuuñ nebiaty hǎnajty tǒø yhane'emyii. Pero coo ja'a Abraham jaduhñ miǎbǒjcy coo ja'a Dios yajtǒjiaty waambaty hǎnajty tǒø quiapxy tǒø miǎdia'agy, paadiǎ Abraham jaduhñ ñǎmaayyǎ coo ja'a Abrahamhajxy hǎnajty yaa miǎhane'ema'añ hǎdaa yaabǎ naaxwiin, mǒødǎ yhaphajxy, mǒødǎ yhoc-hajxy. ¹⁴ Haa ca'a, jaduhñǎ Dios miǎnaañ cooc hajxy yaa miǎhane'ema'añ hǎdaa yaabǎ naaxwiin pǒnjaty jaduhñ mǎbǒjpa coo ja'a Dios yajtǒjiaty waambaty hǎnajty tǒø miǎna'añ. Jaduhñ miǎdia'agytiǎgǒ'ǒy coo ja'a Dios ja'a hoybǎ weenbǎ hajxy xmio'owáanǎm je'eguiǒxpǎ coo hajxy jaduhñ nmǎbǒjcǎm. Pero coo ja'a hoybǎ weenbǎ hajxy hǎxǒpy nbǎatǎm je'eguiǒxpǎ coo ja'a jecymiǎdia'agy hajxy hoy ngudiúunǎm, ja'a Moisés jecy quiujǎhyyǎbǎ, cab jaduhñ cu choobaaty coo ja'a Dios hajxy jaduhñ tǒø xñǎmáayyǎm coogǎ mayhajt hǎnajty tiuna'añ coo ja'a hoybǎ weenbǎ hajxy xmio'owáanǎm. Ni jaduhñ cu quia'a tsoobaaty coo hǒjts cu nmǎbǒjcǎm coo ja'a Dios jaduhñ yajtǒjiaty waambaty tǒø quiapxy tǒø miǎdia'agy. ¹⁵ Hiǎ, cabǎ jecymiǎdia'agy hajxy hoy ngudiúunǎm, ja'a Moisés jecy quiujǎhyyǎbǎ. Coo hajxy jaduhñ nga'a cudiúunǎm, paady hajxy ngǎdiéhyyǎm. Y paady jaduhñ yhahixǒ'ǒy coo hajxy ngumǎdǒowǎmǎt. Pero pǒnjaty ja'a jecymiǎdia'agy tǒø quia'a mǎdoy, ja'a Moisés jecy quiujǎhyyǎbǎ,

cab hajxy jaduhñ quiumädowa'añ, hoy hajxy tøø quia'a jagä tuñ nebiä Moisés jecy yhanehmian.

¹⁶ Coo ja'a Abraham jaduhñ jecy miäbøjcä ja'a Dios miädia'agy coo ñämaayyä coogä Abrahamhajxy hänajty yaa miähane'ema'añ hädaa yaabä naaxwiin, mөөdä yhap mөөdä yhoc-hajxy, paadiä tøyhajt hajxy nmөөd-hájtäm coo ja'a Dios ja'a hoybä weenbä hajxy nägøxiä xmio'owáañäm nä'ä mayhajt, coo ja'a Abraham hajxy nbamäbøjcämät coo ja'a Dios yajtøjiaty waambaty tøø miäna'añ, mөөd højts judíos, mөөd mijts ca'a judióspä. Coo ja'a Abraham hajxy jaduhñ nbamäbøjcämät, jaduhñ mäwiin hajxy nägøxiä xyajmäbáatäm nebiä Abraham hajxy xyhaphájtäm yhoc-hájtäm. Jaduhñ quiähxø'øgy coo ja'a Abraham hajxy nhøjxhájtäm ndecyhájtäm. ¹⁷ Hix, jaduhñ jim myiñ cujaay maa ja'a Diosmädia'aguiän cooc ja'a Dios ja'a Abraham piädaacy coo ja'a jäya'ayhajxy mayhagajptpä yhaphat yhoc-hadøøjät ja'a Abraham. Y miäbøjc ja'a Abraham jaduhñ coo jaduhñ ñämaayyä coogä tio'oxiøjc hänajty quio'na'awa'añ, hoy hajxy hänajty tøø jia miäjaaná. Paadiä Abraham jaduhñ miäbøjcy, ñajuøøby hänajty jaduhñ coo ja'a Dios mäjaa miөөdä coo ja'a ho'oguiäya'ay yagjujypiøjtägátsät, y coo mäjaa miөөdäbä coo ja'a jäya'ay quiunúu'xät ja'a hajxy hänajty ca'a miimb ca'a cahbnä. Y coo ja'a Abraham hajxy jaduhñ nbamäbøjcäm, jaduhñ mäwiin hajxy nmäbáatäm nebiä Abraham hajxy xyhaphájtäm yhoc-hájtäm. Jaduhñ quiähxø'øgy coo ja'a Abraham hajxy nhøjxhájtäm ndecyhájtäm.

¹⁸⁻²¹ Coo ja'a Dios ja'a Abraham jaduhñ jecy ñämaayy coogä mayhagajptpä-jäya'ayhajxy hänajty yhaphada'añ tieedyhada'añ ja'a Abraham, tøø ja'a Abrahamhajxy hänajty miäjaaná mөөdä tio'oxiøjc. Mägo'x-jomøjtä Abraham hänajty miөөdä. Y ja'a tio'oxiøjc, ja'a Sarahajpä,

cahnä hänäjty ñäl'ägädä huungpaadyñä, hoyyä jomøjt hänäjty tøø jia nõcxnä coo yhuungpáadät. Pero cabä Abraham jaduññ ñäl'ägädä mõjpádaacy coo hajxy hänäjty tøø miäjaanä. Hamuumdu'jootä Abraham jaduññ miäbøjcy nægø'ø nädecypä neby hänäjty tøø ñäma'ayi-ijän ja'a Diósäm coog hänäjty jäya'ay may yhaphat yhoc-hada'añii. Paady jaduññ tiøjiajty. Jaduññ jim myi-imbä cujaay maa ja'a Diosmädia'aguiän cooc ja'a Abraham yhap yhoc-hajxy hänäjty jiaančh tehñ miayø'øwa'añ. Paadiä Abraham jaduññ miäbøjcy, ñajuøøby hänäjty jaduññ coo ja'a Dios mäjaa miøødä coo jaduññ yajtøjiädät waambaty hänäjty tøø quiapxy tøø miädia'agy. Mänitä Abraham ja'a Dios jaduññ miøjpádaacy jiaančhpádaacy. ²² Coo ja'a Abraham jaduññ miäbøjcy, paady hawa'adstuum piädaacä.

²³ Jaduññ jim myiñ cujaay maa ja'a Diosmädia'aguiän coo ja'a Abraham piädaacä hawa'adstuum je'eguiøxpä coo ja'a Dios miädia'agy miäbøjcäxä coogä Dios yajtøjiaty waambaty tøø quiapxy tøø miädia'agy. ²⁴ Jaanä jaduññ højtsä Diosmädia'agy xñänóømämbä. Coo ja'a Dios ja'a miädia'agy hajxy jaduññ nmäbøjcämbät, jaduññä Dios hajxy xpiädäacämbät hawa'adstuum, je'eguiøxpä coo ja'a Dios ja'a Jesucristo yagjujypiøjtägajch. Ja'a Jesucristo, je'e hajxy nWiindsøn'hájtäm. ²⁵ Jaaya'ay jaduññ nähdujcä coo hajxy xñähho'túutäm. Jaduññä nbojphájtäm ja'a ngädieyhájtäm hajxy xyajñähwáatsäm. Y coo ja'a Jesucristo jaduññ yagjujypiøjtägajtsä, jaduññ hajxy nmäh-móøyyänä hawa'adstuum.

5

¹ Hoorä, coo hajxy nmäbøjcäm coo ja'a Jesucristo hajxy tøø xñähho'túutäm, paadiä Dios hajxy tøø xyajñähwáatsäm ja'a nbojphájtäm ja'a ngädieyhájtäm. Paady

hajxy xpiädáacäm hawa'adstuum. Jootcujcä Dios hajxy jaduhñ xmiøødhíjtäm. ² Coö ja'a Jesucristo hajxy jaduhñ tøø xñähho'túütäm, coö je'e jiuujyipiøjtägajch, paadiä Dios hajxy xquiumáayyänä. Paady hajxy nxooñdáacäm. Y coö jaa tøyhajt hajxy jaduhñ nmøødhájtäm coö ja'a Dios hajxy jim xyajnøcxáanäm maa ja'a wyiinduuman, paady hajxy jootcujc nhíjtäm. ³⁻⁴ Jaaná jaduhñduhmbä, xooñdáacäm hajxy hädaa yaabä naaxwiin, hoy hajxy yaa nja tsaachpøjcäm. Coö hajxy nmee'xtújcämät, jaduhñä Diosmädi-a'agy hajxy hoy ngudiúunämät. Y coö hajxy jaduhñ hoy ngudiúunämät, jaduhñä tøyhajt hajxy nmøødhadäänäm coö ja'a Dios hajxy jim xyajnøcxáanäm maa ja'a wyiinduuman. Coö hajxy jaduhñ nnajuøøyyäm coö hajxy jim xyajnøcxáanäm, paady hajxy yaa nxooñdáacäm, hoy hajxy yaa nja tsaachpøjcäm. ⁵ Coö ja'a Dios jaduhñ miäna'añ coog hajxy jim xyajnøcxáanäm maa ja'a wyiinduuman, yejpiä Dios ja'a tøyhajt jaduhñ. Cab hajxy jaduhñ xwyiinhóhñäm. Hix, tøø ja'a Dioshespíritu hajxy xyhadägøøyy xjioottägøøyyäm. Jaduhñ hajxy xyajnajuøøyyäm coö hajxy xjiaançh tehñ chójcäm hamuumdu'joot.

⁶ Coö ja'a Dios yajnáhdijy coö hánajty tøø yhabaatnä, mänitä Jesucristo hajxy hoy xñähho'túütäm. Jaduhñä nbojhájtämä ngädieeyhájtäm hajxy xyajnáhwáatsäm. Cab hajxy hánajty hoy nnähwa'adsáanäm hamdsoo je'eguiøxpä coö hajxy hánajty ngahwiindøyhájtäm. ⁷ Hix, caj miiçh pøn xchoj nähho'tú'udät, hoy miiçh hánajty mja hojiäya'ayhaty. ⁸ Pero ja'a Dios hajxy xjiaançh tehñ chójcäm, paadiä Jesucristo hajxy hoy xñähho'túütäm, hoy hajxy hánajty nja cuboj nja cugädieeyhájtäm. ⁹ Hoorä, coö ja'a Jesucristo hajxy tøø xñähho'túütäm, coö ja'a Dios hajxy tøø xpiädáacäm hawa'adstuum, jaduhñä tøyhajt hajxy nmøødhájtäm coö ja'a Dios hajxy xquia'a yajcumäowáanäm. ¹⁰ Coö hajxy hijty cøxypänejpiä

njäya'ayháltäm, jaduñ mäwiin hijty piaady néjjiäm coo ja'a Dios hajxy hijty nmädsipháltäm. Pero coo ja'a yHuung Jesucristo hajxy hoy tøø xñähho'túutäm, ja'a hajxy nWiindsøn'háltämbä, paady cabä Dios hajxy nmädsipháltänä. Hoyyä Dios hajxy xyhuungháltänä. Tu'ugjoot tu'ugwiinmahñdiä Dios hajxy nmøødháltänä. Y coo ja'a Jesucristo jiuypiojtägajch, coo jim ñcxtägajch maa ja'a Tieediän, jaduñä tøyhajt hajxy nmøødháltäm coo hajxy jim xyajnøcxáanämbä. ¹¹Jaduñä tøyhajt hajxy nmøødháltämbä coo ja'a Dios hajxy xquiumáayyänä. Paady hajxy jaduñ xquiumáayyänä coo ja'a Jesucristo ja'a nbojpä ngädieey hajxy tøø xyajnahwáatsäm. Tsøcxä hajxy jaduñ xoondáacäm.

¹²Hoorä, tu'jäya'ay jecy quia'a cudiuundsohñ neby hänäjty tøø yhane'emyiijän ja'a Diósäm. Ja'a Adánhöch jaduñ nnänøømby, ja'a hajxy jecy nhapháltäm ndeedyháltäm. Jaduñä pojpä cädieey yaa choñdaacy hädaa yaabä naaxwiin. Y coo ja'a Adán jaduñ jecy quiädiehy, paady jaduñ yhuuc ho'tsohmä. Y coo ja'a Adán hajxy jaduñ jecy nhapháltäm ndeedyháltäm nägøxiä, paady hajxy nbagädiéhyäm, paady hajxy nbahó'cäm. ¹³⁻¹⁴Høxtä jecyjiäya'abiaady hajxy haxøøg jiäya'ayhajty, paady hajxy nägøxiä yho'cy, hoyyä Moisés hänäjty quia'a jagä miññä, quia'a jagä ca'ayñä, hoyyä Dios hänäjty quia'a jagä hane'emyñä coo ja'a jäya'ayhajxy hoy jiäya'ayhádät nebiä Moisés jecy quiujahyyän, hoy hajxy hänäjty quia'a jagä pagädiehbiä nebiä Adán hänäjty tøø quiädieeyän. Hoyyä Dios hänäjty quia'a jagä hane'emyñä coo ja'a jäya'ayhajxy hoy jiäya'ayhádät, nägøxiä jäya'ayä pojpä cädieey hajxy hänäjty miøødá. Y ja'a Adán, jaduñ je'e jecy ñämaayyä cooc hänäjty yho'oga'añ, pø cab hänäjty jaduñ quiudiuna'añ nebiä Dios hänäjty tøø yhane'emiän. Y coo ja'a Moisés jaduñ cujecy quiujahy nebiatiä Dios

hänajty tøø yhane'emiän, jaduñä jäya'ayhajxy nägøxiä ñämäayyäbä coogä Adán hajxy hänajty nägøxiä piah'o-gaambä, pø cab hajxy hänajty quiudiuna'añ nebiä Dios hänajty tøø yhane'emiän. Ja'a jecyjiäya'ayhajxy hänajty jibä, cahnä Moisés hänajty quiujaayñä nebiatiä Dios hänajty tøø yhane'emy, cab hajxy hänajty jaduñ nämay ñajuø'oy coo hajxy hänajty yho'oga'añ, pø haxøøg hajxy hänajty jiäya'ayhaty.

¹⁵ Coo ja'a Adán ja'a Dios miädia'agy jaduñ jecy quia'a cudiuunä, paady hajxy nägøxiä nhó'cäm. Pero coo ja'a Jesucristo ja'a Tiedia miädia'agy jaduñ quiudiuunä, paady hajxy nnähwaats nguhwáatsäm. Coo ja'a Jesucristo hajxy jaduñ hoy xñähho'túutäm, paadiä Dios hajxy xpiädáacäm hawa'adstuum. Møjmayhajtä Dios jaduñ tiuun maa højtshájtäm, pønjetiä miädia'agy tøø miäbøjcä ja'a Jesucristocøxpä. Paady hajxy jim xyajñøcxáanäm maa ja'a wyiinduumän. ¹⁶ Coo ja'a Jesucristo hajxy hoy tøø xñähho'túutäm, jaduñä tøyhajt hajxy nmøødhájtäm coo ja'a nbojpä ngädieey hajxy jaduñ xyajñähwáatsäm nägøxiä, pønjaty tøø miäbøcy ja'a Jesucristocøxpä. Paadiä Dios hajxy xpiädáacäm hawa'adstuum. Paady hajxy jim xyajñøcxáanäm maa ja'a wyiinduumän. ¹⁷ Jaduñds je'e, coo ja'a Adán ja'a Dios miädia'agy jecy quia'a cudiuunä, paady hijty yhawiinmatsä coo ja'a Dios hajxy xpiädáacämät haxøøgtuum. Pero tøø ja'a Jesucristo hajxy xyajñähwaats xyajcuhwáatsäm. Møjmayhajtä Dios jaduñ tiuun. Paadiä Dios hajxy xquia'a päda'agáanäm haxøøgtuum, pønjaty hawa'adstuum. Y paady højtsä hoyhajtä weenhajt yaa nbaadánäm hädaa yaabä naaxwiin je'eguiøxpä coo ja'a Jesucristo hajxy tøø xyajñähwaats tøø xyajcuhwáatsäm.

¹⁸⁻¹⁹ Mänaa ja'a Jesucristo yaa yhitiän hädaa yaabä naaxwiin, ca'xiä Tiedia miädia'agy quiudiuunä mä-

duhñtiä yaa yhiyty. Y coo hajxy jaduhñ xñähho'túutäm, ja'a Tieediä miädia'agy jaduhñ quiudiuunä. Jaduhñ hajxy xyajnahwáatsäm. Coo hajxy jaduhñ nmábójcämät coo ja'a Jesucristo hajxy tøø xjiaančh nähho'túutäm, mäniä Dios hajxy xpiädáacämät hawa'adstuum. Hoorä, ja'a Adán, haxøøg je'e jecy jiäya'ayhajty. Cabä Adán ja'a Dios miädia'agy jecy ñä'ägädä cudiuunä. Y coo ja'a Adán hajxy jecy nhaphájtäm ndeedyhájtäm, paadiä Dios miädia'agy hajxy nga'a nä'ägädä cudiunáañämbä. Coo hajxy jaduhñ nga'a cudiunáañäm, paady hijty yhawiinmatsä coo ja'a Dios hajxy jiiby cu xpiädáacäm haxøøgtuum. Pero coo ja'a Jesucristo hajxy tøø xñähho'túutäm, paady hajxy jim xyajnoxcáañäm Dioswiinduum. Jaduhñä Dios mayhajt mõj jiaančh tehñ tiuun maa højtshájtäm.

²⁰⁻²¹ Coo ja'a Dios jecy yhanehmy coo ja'a jäya'ay-hajxy hoy jiäya'ayhädät, mäniä Moisés jaduhñ quiu-jahy. Y coo ja'a nocy hajxy ngápxämät, ja'a Moisés jecy quiujáhyäbä, jaduhñ hajxy nnajuóøyyämät coo hajxy njaančh cädiéhyä. Hoy hajxy jaduhñ nja najuóøyyäm, cab hajxy nmábójcäm. Pero xjiaančh tehñ ñäxúu'tsämä Dios. Paadiä mõjmayhajt jiaančh tehñ tiuun maa højtshájtäm. Jaduhñds je'e, coo hajxy ngädiéhyä, paady hajxy nhó'cäm. Pero coo ja'a Dios hajxy xñäxúu'tsäm, paadiä Jesucristo hajxy hoy xñähho'túutäm, ja'a hajxy nWiindsøñhájtämbä. Jaduhñä Dios hajxy xpiädáacäm hawa'adstuum. Mäniä hajxy xyagjugyhadáañäm cøjx-ta'axiøø nebiä Dios jiugyhatiän.

6

¹ Cab jaduhñ ñä'ägädä hahixø'øy coo hajxy nmánáañämät: “Tsøg hajxy cädiéhyä tehngajnä. Haa ca'a, tehngajnä Dios hajxy xñäxuudsáañäm.” ² Caj pues, cab jaduhñ yhahixø'øy coo hajxy tehngajnä

ngädiéhyämät. Haa ca'a, tøø ja'a pojpä cädieey hajxy nnajtshixóøyyänä coo ja'a Diosmädia'agy hajxy tøø nmäbójcäm ja'a Jesucristocøxpä. ³⁻⁵ Tøgä cab hajxy mnajuø'øyä coo ja'a Jesucristo hajxy nmøødhjätäm tu'ugjoot tu'ugwiinmahñdy coo hajxy tøø nnäbéjtäm ja'a Jesucristocøxpä. Y coo hajxy jaduhñ tøø nnäbéjtäm ja'a Jesucristocøxpä, jaduhñ mäwiin piaady néjjiämä Jesucristo hajxy häxøpy näguipxy tøø nmøødhó'cäm. Jaanä jaduhñ mäwiin piaatpä néjjiämä Jesucristo hajxy häxøpy näguipxy tøø nmøødnaaxtägóøyyäm. Coo ja'a pojpä cädieey hajxy tøø nnajtshixóøyyänä, jaduhñ miädia'agytiägø'øy coo hajxy jaduhñ ween nga'a jatcøøyyänä haxøøg. Y coo ja'a Dios ja'a Jesucristo yagjyypjøjtägajch ja'a miäjaahaam, mänitä Jesucristo jugyhajt hawiinjemybiä miøødhajty. Jaanä jaduhñ højtshjätämbä, coo hajxy nnäbéjtäm, jaduhñ mäwiin piaady néjjiämä Jesucristo hajxy häxøpy näguipxy tøø nmøødjyypjøjtägajtsäm. Paadiä jugyhajt hajxy hawiinjemybiä nmøødhjätämbä. Tøyhajt jaduhñ. Jaduhñä hojiootä howyiinmahñdy hajxy nmøødhjätämät. Jaduhñ miädia'agytiägø'øy coo ja'a Dios hajxy xyagjygyhadäänäm cøjxta'axiøø neby je'e jiugyhatiän. ⁶ Coo ja'a Jesucristo hajxy tøø xñähho'túutäm cruzcøxp, mänitä nhaxøøgwiinmahndyhajxy quiuhdägóøyyänä nebiä haxøøgwiinmahñdy hajxy nägøxiä hijty nmøødhjätäm. Coo ja'a nhaxøøgwiinmahñdyhajxy jaduhñ quiuhdägóøyyänä, paadiä Jesucristo hajxy nmøødhjätänä tu'ugjoot tu'ugwiinmahñdy. Paady hajxy jaduhñ tøø xñähho'túutäm, jaduhñä nhaxøøgwiinmahñdyhajxy jaduhñ quiuhdägóøyyänä. Jaduhñä njoot hajxy nga'a pädáacänät maa ja'a haxøøgpän. ⁷ Pønä Jesucristo hänajty møødhijp tu'ugjoot tu'ugwiinmahñdy mänaa ja'a Jesucristo yho'oguiän,

cabä jioot piädaacnä maa ja'a haxøøgpän. ⁸ Coö hajxy nmäbøjcäm coö ja'a Jesucristo hajxy jaduñ tøø xñähho'túutäm møød coö jadähooc jiuypiojcy, jaduñ mäwiin miäbaady néjjiäm coö ja'a Jesucristo hajxy häxøpy näguipxy tøø nmøødjuypiojcam. Paady hajxy jaduñ njugyhadaänäm cøjxta'axiøø neby je'e jiugyhatiän. ⁹ Coö ja'a Jesucristo jiuypiojtägajch, cab jaduñ mänaa yho'tägatsaännä. Homiänaaxøøjä homiänaadsuujä jiugyhada'añ. Tøyhajt jaduñ. ¹⁰ Hiç, tähoocnähhö'tu'utiä ja'a Jesucristo hajxy xñähho'túutäm. Jaduñä nbojpä ngädieey hajxy tøø xyajnähwáatsäm. Y coö ja'a Jesucristo tøø jiuypiojtägajtsnä, paady homiänaaxøøjä homiänaadsuujä ja'a Dios miøødhidaännä. ¹¹ Jaaná jaduñ højtshájtämbä, coö ja'a Jesucristo hajxy nmøødhíjtänä tu'ugmädia'agy, tsøg hajxy jahmiejtstáacäm coö ja'a nhaxøøgwiinmahñdyhajxy tøø quiuhdägóoyyänä. Jaduñ hajxy tsøc jahmiejtstáacämbä coö hawiinjemybiä jugyhajt hajxy nmøødhíjtänä nebiä Jesucristo hánajty miøødhatiän mänaa jiuypiojtägachän. Paadiä Dios hajxy nmøødhíjtämbä tu'ugmädia'agy.

¹² Cab hajxy cøxypänejpiä tsøc jatcøøyyänä. Cabä njootä ngopc hajxy nbädaacánät maa ja'a haxøøgpän. ¹³ Cabä ngø'ø ndecy hajxy nyaghanáxjänät, ni ja'a nhaawhájtäm. Tsøgä Diosmädia'agy hajxy hamuumdu'joot cudiúunäm. Coö ja'a Jesucristo hajxy hánajty nmøødhíjtäm tu'ugjoot tu'ugwiinmahñdy mänaa yho'oguiän, møød mänaa jiuypiojtägachän, paadiä Dios hajxy nmøødhíjtänä tu'ugjoot tu'ugwiinmahñdy. ¹⁴⁻¹⁵ Paadiä Dios hajxy xquiumáayyäm coö mayhajt tøø tiuñ maa højtshájtäm, ca'a jie'eguiøxpä coö ja'a mädia'agy hajxy nja wi'i quiudiunäänäm, ja'a Moisés jecy quiujáhyyäbä. Coö ja'a Dios mayhajt jaduñ tiuñ

maa hõjtshájtäm, je'ečh jaduñ nñänøomby coo hajxy xyajnáhwaats, coo hajxy xyajcuhwáatsäm. Hoyyá Dios mayhajt jaduñ tiuun maa hõjtshájtäm, cab jaduñ ñä'ägä hahixø'øy coo hajxy haxøøg njatcøøyyämät tehngajnä. ¹⁶ Tsøg hajxy paquiä mädiáacäm neby hajxy yaa nguhdujthájtäm hädaa yaabä naaxwiin. Jaduhñä cuhdujt hajxy nmøødhájtäm coo hajxy nwiimbíiwämät pøn jaduñ nmädunáanäm. Y jaduñ hajxy ngudiúunäm nebiatiä nwiindsøn hájtäm hajxy xyhanéhmäm. Jaaná jaduñä cuhdujt hajxy nmøødhájtämbä coo hajxy nwiimbíiwämät mädyii hajxy nyajtunánäm, ja'a Diosmädia'agy, o ja'a nhaxøøgwiiinmahñdyhájtäm. Coo ja'a Diosmädia'agy hajxy nyajtúunämät, mänitá Dios hajxy jaduñ xquiumáayyämät. Pero coo ja'a nhaxøøgwiiinmahñdy hajxy nyajtúunämät, cabä Dios hajxy jaduñ nmøødhájtämät tu'ugjoot tu'ugwiiinmahñdy. Mänitá Dios hajxy xpiadáacämät haxøøgtuum. Tøyhajt jaduñ. ¹⁷ Dioscujú'uyäp ja'a Dios coo mijtsä Diosmädia'agy hamuumdu'joot myajtuunä neby hajxy tøø mmäbøquiän. Cahnä Diosmädia'agy hajxy mmädoyñä, haxøøg hajxy hijty mjäya'ayhaty. ¹⁸ Coo mijts tøø mmäbøcy coo ja'a Jesucristo hajxy tøø xñähho'túutäm, paadiä mhaxøøgwiiinmahñdy hajxy tøø mnajtshixøøñä. Tøø ja'a mjoot hajxy mbäda'agy coo hajxy hamuumdu'joot mhojiäya'ayhájnät. ¹⁹ (Páadyhöch jaduñ nmädia'agy neby hajxy yaa nguhdujthájtäm hädaa yaabä naaxwiin, jaduñ hajxy hoy mwiinjuø'øwät. Cab hajxy jaduhyä hoy mwiinjuø'øwa'añ.) Hijty, jaančh tehñ yhaxøøgjaty hajxy hijty mjäya'ayhaty. Cøxypänejpä hajxy hijty mjaančh tehñ jiatcø'øy. Maas hanaxiä hajxy hñajty mjatcø'øwa'añ tehngajnä. Pero tøø ja'a Diosmädia'agy hajxy mmäbøjnä ja'a Jesucristocøxpä, paadiä Diosmädia'agy hajxy myajtúunnät nägø'ø

nädecypäi.

²⁰ Coo ja'a mhaxøøgwiinmahñdy hajxy hijty myajtuñ, cabä mjoothajxy hijty chocy coo hajxy hoy mjäya'ay-hädät. Coo hajxy häxøpy tøø mhojiäya'ayhaty, tøø ja'a Dios hajxy häxøpy xquiumay. ²¹ Hoçhähdiiuunnä hajxy hijty mjatcø'øy. Cabä tii hoybä hajxy hijty mbaady. Haxøøgtuum hajxy hijty mnä'ägädä häda'a-ga'añ. ²² Paadiä Jesucristo hajxy tøø xñähho'túutäm, coo ja'a mhaxøøgwiinmahñdy hajxy jaduñ mnajt-shixó'øwät. Tøyhajt jaduñ. Paadiä Jesucristo hajxy mmøødhijnä tu'ugjoot tu'ugwiinmahñdy. Coo ja'a mjoot hajxy hamuumdu'joot tøø mbäda'agy coo ja'a Dios hajxy mmøødtuna'añ, paadiä hoyhajtä weenhajt hajxy mbaada'añ. Jaduñ miädia'agytiägø'øy, coo mi-jtsä Dios hoyhäna'c xyagjada'añ nebiä Jesucristo yhoy-häna'c-hatiän, paadiä Dios hajxy xyagjyghada'añ cøjx-ta'axiøø neby je'e jiugyhatiän. ²³ Coo hajxy cøxypänejpäi njatcøøyyämät, cabä Dios hajxy jaduñ nmøødhjätämät tu'ugmädia'agy, møød haxøøgtuum hajxy nhädáacämät. Pero tøø ja'a Dios mayhajt tiuñ coo ja'a yHuung hajxy yaa tøø xyajnäguéjxäm, ja'a Jesucristo, ja'a hajxy nWiind-søñhajtämbä. Hoyyä Jesucristo hajxy tøø xñähho'túutäm. Jaduñä Dios hajxy xpiädáacäm hawa'adstuum. Coo hajxy jaduñ nmäbøjcamät, mänitä Dios hajxy xyagjyghajtämät cøjxta'axiøø neby je'e jiugyhatiän.

7

¹ Mägu'ughajpädøjc, mnajuøøby hajxy jaduñ nebiä cuhdujt yaa myiñ hädaa yaabä naaxwiin. Ja'a häna'c-hajxy møjcuhdujtmøødpä, ja'a häna'c hajxy jaduñ xyhanéhäm mäduhñtiä hajxy yaa njyghajtäm, túhmäts. Pero coo hajxy nhó'cänä, cab hajxy jaduñ xyhanéhmänä. ²⁻³ Høxtahmsä to'oxiøjc

ja'a ya'adiøjcmøødpä, jaduñä cuhdujt myiñ coo hajxy ñimiøødtsána'awóøjät mäduñtiä hajxy nämetsc jiugyhaty. Hoorä, coo ja'a to'oxiøjc wiingya'adiøjc miøødtsána'awät, y je'enä ñihyhap jiugyhatyñä, haxøøgä to'oxiøjc jaduñ jiatcø'owät. Hiç, cabä cuhdujt jaduñ myiñ coo jaduñ jiatcø'owät. Pero coodsä ñihyhap yhó'ogät, mänitä quiçy cuhdujt miøødänä coo piøjtägätsät, y cab jaduñ ñeipiä.

⁴ Hoorä, mägu'ughajpädøjc, coo mijtsä Jesucristo hänajty mmøødhity tu'ugjoot tu'ugwiinmahñdy mänaa yho'oguiän, paadiä jecymiädia'agy hajxy xquia'a hanehmñä, ja'a Moisés jecy quiujáhyyäbä. Jaanä jaduñduhmä, tu'ugjoot tu'ugwiinmahñdiä Jesucristo hajxy hänajty mmøødhíjtäbä mänaa jiuypipiøjtägachän. Tøø ja'a mjoot hajxy mbäda'agy coo jaaya'ay hajxy mmøødtúnät. Jaduñä Dios hajxy mmøødtúumbät. ⁵ Cahnä hajxy hänajty nmäbøjcäm coo ja'a Jesucristo hajxy hoy xñähho'túutäm, jaduñä njoot hajxy hänajty nnä'ägädä pädáacäm coo hajxy hänajty jaduñ njatcø'owáañäm hoñeipiä. Paady hajxy hijty nhäda'agáañäm jiiby møjcu'uhaam. Jaanç tehñ yhaxøøg hajxy hänajty nwiinmahñdyhájtäm. Hoyyä mädia'agy hajxy hänajty nja mädoowäm, ja'a Dios ja'a Moisés jecy ñajtsapxøøyyäbä, cab hajxy hänajty nyajtunáañäm. ⁶ Cahnä Diosmädia'agy hajxy hänajty nmäbøjcäm ja'a Jesucristocøxpä, tehnganjä ja'a jecymiädia'agy hajxy hänajty nja wi'i quiudiunáañäm, ja'a Moisés jecy quiujáhyyäbä. Jadúñäc tyijy hajxy hänajty nnähwa'adsáañäm. Pero coo ja'a Jesucristo hajxy tøø xñähho'túutäm, paadiä jecymiädia'agy jaduñmä xquia'a hanehmñä. Coo ja'a Jesucristo hajxy tøø xyajñähwáatsäm, jaduñ hajxy xyagju-gyhadaañäm çøjxta'axiøø neby jaaya'ay jiugyhatiän. Y xpiuhbéjtämä Dioshespíritu hajxy nebiä Dios hajxy hoy

nmøødtúunämät.

⁷⁻⁹ Cáhnočhä jecymiädia'agy hánajty nmädoyñä, ja'a Moisés jecy quiujáhyyäbä, cábočh hánajty nnajuø'øy cooč hánajty hoy nga'a jäya'ayhaty. Pero cooč jecymiädia'agy jaduhñ nwiinjuøøñä, páadyhöch nnajuøøñä cooč cøxpänejniä njatcø'øy hoñejpiä. Coočhä haxøøgwiinmahñdy jaduhñ njaančh tehñ miøødä, páadyhöčhä njoot hijty chocy cooč cøxpänejniä njatcø'øwät hoñejpiä nebiatiä jecymiädia'agy hajxy xjia hanéhñäm coo hajxy nga'a jatcøøyyämät, ja'a Moisés jecy quiujáhyyäbä. Y coočhä jecymiädia'agy jaduhñ nmädoy, maas hanáxiöch cøxpänejniä njaac jatcø'øy tehñgajnä. Páadyhöčhä tøyhajt nmøødä cooč hijty nga'awa'añ haxøøgtuum.

¹⁰ Hóyhöch ndijy jaduhñ ngudiuna'añ ja'a jecymiädia'agy, ja'a Moisés jecy quiujáhyyäbä. Y cooč häxøpy hoy ngudiuñ, hawa'adstúumhöčhä Dios cu xpiädaacy. Pero cábočhä jecymiädia'agy jaduhñ hoy nnä'ägädä cudiuna'añ, páadyhöch hawiinmats nhädá'agät haxøøgtuum.

¹¹ Hoy ndíjyhöchhä jecymiädia'agy hánajty nyajtuna'añ, ja'a Moisés jecy quiujáhyyäbä. Jaduhñ ndíjyhöchhä Dios ja'a hoyhajtä weenhajt xmio'owa'añ. Pero cábočhä tøyhajt hánajty nnä'ägä møødä. Coočhä haxøøgwiinmahñdy hánajty nmøødä, páadyhöčhä jecymiädia'agy hánajty hoy nga'a yajtuñ, ja'a Moisés jecy quiujáhyyäbä. Páadyhöch hánajty nga'awa'añ haxøøgtuum.

¹² Ja'a jecymiädia'agy ja'a Moisés jecy quiujáhyyäbä, je'e hajxy xyhanéhñäm coo hajxy hoy njäya'ayhájtämät. Jaduhñ miädia'agy neby hajxy hoy njäya'ayhájtämät. Xyajnajuøøyyäm hajxy jaduhñ coo ja'a Dios howyiinmahñdy jiaančh tehñ miøødä. ¹³ Paadiä jecymiädia'agy jaduhñ yhojy, ja'a Moisés jecy quiujáhyyäbä. Pero hóyhöch hánajty tøø nja mädoy, tehñgájnöch hánajty haxøøg nwi'i jäya'ayhatyñä. Páadyhöch hijty jüiby

nga'awa'añ haxøøgtuum. Hiḡ, cábočhä nwiinmahñdy hánajty yhooyä. Y coočhä jecymiädia'agy jaduhñ nmädooyy, ja'a Moisés jecy quiujáhyyäbä, maas hanáxiöch hánajty haxøøg njatcø'owa'añ.

¹⁴ Jaduhñä tøyhajt hajxy nmøødhájtäm coo ja'a jecymiädia'agy hajxy xyhawáanäm coo ja'a Dios howyiinmahñdy jiaančh tehñ miøødä. Jaaná jaduhñ hajxy xyhawáanämbä coo Dios ja'a jioot chocy coo hajxy hoy njäya'ayhájtämät. Pero højts, cab højts hoy nnä'ägädä jäya'ayhájtäm, je'eguiøxpä coo højts hädaa yaabä naaxwiimbä wiinmahñdy nmøødhájtäm. Hamdsoojoot hajxy jaduhñ haxøøg njatcøøyyäm. ¹⁵ Jaduhñä njoothajxy jia wi'i chójcäm coo hajxy hoy njäya'ayhájtämät, pero cab hajxy nnä'ägädä jadáanäm hojiäya'ayhat. Pátiidä hajxy jaduhñ coo nga'a jadáanäm. Cøxypäneppiä hajxy nwi'i jiatcøøyyäm, hoy hajxy nja najuøøyyäm coo jaduhñ yhaxøøgä. ¹⁶ Nnajuøøyyäm hajxy jaduhñ coo ja'a jecymiädia'agy yhooyä, ja'a Moisés jecy quiujáhyyäbä. Jaduhñä njoothajxy jia tsójcäm coo hajxy ngudiunämät nebiatiä jecymiädia'agy hajxy xyhanéhmäm. Pero cab hajxy hoy nnä'ägädä cudiunáanäm. ¹⁷ Pero, ca'a yhamdsoojoot hajxy jaduhñ haxøøg njatcøøyyäm. Ja'a nhaxøøgwiinmahñdy hajxy jaduhñ xyagjaticøøyyäm haxøøg. ¹⁸⁻¹⁹ Cabä Diosmädia'agy hajxy hoy ngudiunáanäm hamdsoojoot, hoyyä njoothajxy jia tsójcäm coo hajxy ngudiunämät. Haxøøg hajxy njatcøøyyäm, hoyyä njoothajxy jaduhñ quia'a jagä tsójcäm coo hajxy jaduhñ njatcøøyyämät.

²⁰⁻²¹ Hiḡ, ja'a nhaxøøgwiinmahñdy hajxy haxøøg xyagjaticøøyyäm, ca'a yhamdsoojootä. ²² Jaduhñä Diosmädia'agy hajxy xyhanéhmäm nebiaty hajxy hoy njäya'ayhájtämät. Njoodótyhøch ngopcóotyhøch jaduhñ njuø'øy coo ja'a Diosmädia'agy jiaančh tehñ yhooyä. ²³ Nnajuøøbiöch jaduhñ coočhä

haxøøgwiinmahñdy njaančh tehṃ miøødä. Páadyhøčhä howyiinmahñdy hoy nga'a nä'ägädä yajtuna'añ. Hix, ja'a nhaxøøgwiinmáhñdyhøch haxøøg xyagjäya'ayhajp. Y cábøch hoy nnä'ägädä najtshixø'øwa'añ.

²⁴ Cooch häxøpy pøn hoy xquia'a yajnähwa'adsa'añ ja'a nhaxøøgwiinmáhñdyhøch, cábøchä Dios häxøpy hoy nmøødhida'añ tu'ugjoot tu'ugwiinmahñdy. Jíiby-høch häxøpy nhäda'aga'añ møjcu'uhaam. Jaančh tehṃ yhoñäxúu'tsnøch häxøpy nhity. ²⁵ Pero nmóobiøchä Dios Dioscujú'uyäp coochä Jesucristo tøø xyajnähwa'ačh, ja'a hajxy nWiindsøn'hájtämbä. Páadyhøčhä Diosmädia'agy hoy nyajtuna'añ ja'a nhowyiinmahñdyháamhøch, hóyhøchä haxøøgwiinmahñdy nja møødnä. Je'ečh tähoocjaty haxøøg xyagjatcøøby.

8

¹ Hoorä, hawa'adstuum hajxy nmähmøøyyänä coo ja'a Jesucristo hajxy nmøødhíjtäm tu'ugmädia'agy. Jaduhñ hajxy ngudiúunäm nebiä Diosmädia'agy hajxy xyhanéh-mäm. Cab hajxy cøxypänejpä njatcøøyyänä. ² Coo ja'a Jesucristo hajxy tøø xñähho'túutäm, paady hajxy xmiøødhíjtäm tu'ugjoot tu'ugwiinmahñdy. Paadiä Diosh-espíritu hajxy xyagjyhadáanäm cøjxta'axiøø nebiä Dios jiugyhatiän. Paadiä Dios hajxy tu'ugjoot tu'ugwiinmahñdy xmiøødhidáanäm homiänaajä. Coo ja'a Jesucristo ja'a nhaxøøgwiinmahñdy hajxy tøø xyajnähwáat-säm, paady hajxy jíiby nga'a häda'agáanänä haxøøgtuum. ³⁻⁴ Coo ja'a Dios ja'a yHuung yaa quiejxy hädaa yaabä naaxwiin, jaduhñ yaa jiäya'ayhajty neby højtshájtäm. Jesucristo je'e. Pero cabä Jesucristo haxøøg jiäya'ayhajty neby højtshájtäm. Mänitä Jesucristo hajxy xñähho'túutäm. Hoyyä Jesucristo ja'a jecymiädia'agy quiuidi-uñ, ja'a Moisés jecy quiujáhyäbä. Pero højtshájtäm,

cab hajxy jaduhñ ngudiúunäm. Paady jaduhñ yhahixø'øy coo hajxy ngumädoowämät. Coo ja'a Jesucristo hajxy xñähho'túutäm, quiumädoow je'e ja'a højtscøxphájtäm jaduhñ. Paadiä jecymiädia'agy hajxy xquia'a hanéh-mänä, ja'a Moisés jecy quiujáhyyäbä. Ja'a Diosheshpíritu hajxy xpiuhbéjtänä coo ja'a Dios hajxy xmiøødhíjtämät tu'ugjoot tu'ugwiinmahñdy. Jaduhñ hajxy xpiuhbéjtämbä coo hajxy haxøøg nga'a jäya'ayhájtänät.

⁵ Y coo ja'a Diosheshpíritu hajxy jaduhñ xpiuhbéjtäm, paady hajxy nxiictaac nmädiaactáacäm nebiä Diosmädia'agy hajxy maas hoy nyajtúunämät. Pero ja'a jäya'ay ja'a Diosheshpíritu ja'a miädia'agy hajxy ca'a cudiunáanäbä, jaduhñ hajxy xyiicta'agy miädiaacta'agy nebiä yhamd-soo wiinmahñdy hajxy yajtuñ. ⁶ Pøñ jaduhñ xiictaacp mädiaactaacp nebiä Diosheshpíritu ja'a miädia'agy maas hoy miäbójcät, je'e ja'a Dios jaduhñ miøødhijpy tu'ugjoot tu'ugwiinmahñdy. Je'eduhñ nøcxaamb Dioswiinduum. Jootcujc je'e jim yhida'añ møødä Dios. Pero pønä yhamd-soo wiinmahñdy wi'i yajtunaamb, ja'a Dios ja'a miädsip je'eduhñ. Haxøøgtuum je'eduhñ ñäl'ägä häda'aga'añ, ⁷⁻⁸ je'eguiøxpä coo ja'a Dios miädsiphaty. Cabä Diosmädia'agy hoy yajtuna'añ, ni ja'a jioot jaduhñ quia'a tso cy coo yajtúnät. Y cab jaduhñ quiumayii ja'a Diósäm.

⁹ Pønä Diosheshpíritu ca'a møødhijp tu'ugmädia'agy, cabä Diosmädia'agy miäbøcy ja'a Jesucristocøxpä. Coo mijts jaduhñ mjaanäh mäbøcy, paady mijtsä Diosheshpíritu mmøødhity tu'ugmädia'agy. Y coo ja'a Diosheshpíritu hajxy jaduhñ mmøødhity, paadiä mhaxøøgwiinmahñdy hajxy tøø mhøxhijxnä. ¹⁰ Tøyhajt jaduhñ coo hajxy nho'ogáanäm, je'eguiøxpä coo ja'a Adán jecy quiädiehy, ja'a hajxy jecy nhaphájtäm ndeedyhájtäm. Pero coo mijtsä Dios tøø xpiäda'agy hawa'adstuum, y coo ja'a Jesucristo hajxy mmøødhity tu'ugmädia'agy, paady

mijtsä Dioshespíritu xyagjugyhada'añ homiänaajä nebiä Dios jiugyhatiän. Jim hajxy xyajnøcx'añ Dioswiinduum. ¹¹ Coo ja'a Dioshespíritu hajxy xmiøødhjítäm tu'ugmädia'agy, paadiä Dios hajxy xyagjujypiøjtägatsáañäm ja'a yhEspírituhaam coo hajxy hánajty tøø nhó'cäm. Jaduhñ hajxy xyagjujypiøjtägatsáañäm nebiä Jesucristo yagjujypiøjtägajtsän.

¹² Mägu'ughajpädøjc, jaduhñds je'e, hahixøøby jaduhñ coo ja'a Dioshespíritu miädia'agy hajxy nyajtúunämät. Cab jaduhñ yhahixø'øy coo ja'a nhamdsoo wiinmahñdy hajxy nyajtúunänät tehngahnä. ¹³ Hix, coo hajxy tehngahnä haxøøg njatcøøyyänät, cabä Dios hajxy hoy nmøødhjítämät tu'ugjoot tu'ugwiinmahñdy. Mänit hajxy jiiby nhädáacämät haxøøgtuum. Pero coo ja'a nhaxøøgwiinmahñdy hajxy nnajtsnixøøyyämät ja'a Dioshespírituhaam, jaduhñä Dios hajxy hoy nmøødhjítänät tu'ugjoot tu'ugwiinmahñdy.

¹⁴ Hix, pønjaty jaduhñ puhbéjtäp ja'a Dioshespíritu nebiä Diosmädia'agy hajxy jaduhñ hoy yajtúnät, Dios yhuung hajxy je'e. ¹⁵ Haa ca'a, ja'a yhEspírituhaamä Dios hajxy xyhuunghjítäm, paady hajxy nnämäaayyäm: "Diosteedy." Y coo ja'a Dios hajxy xyhuunghjítäm, paadiä Dios hajxy nga'a tsähgøøyyänä neby hajxy hijty ndsähgøøyyäm coo hajxy hijty xquia'a pädáacämnä hawa'adstuum. ¹⁶ Y coo ja'a Dioshespíritu hajxy jaduhñ xmiøødhjítäm, jaduhñä tøyhajt hajxy xmiøøyyäm coo ja'a Dios hajxy xyhuunghjítänä. ¹⁷ Coo ja'a Dios hajxy xyhuunghjítäm näguipxy møødä Jesucristo, paadiä Jesucristo hajxy jim xyajnøcxáañäm Dioswiinduum. Paadiä Dios hajxy madiu'u xquiunuu'xáañäm näguipxy møødä Jesucristo, nebiä Dios jecy miänaañän cooc hajxy xquiunuu'xáañäm. Y coo hajxy ndsaächpøjcämät ja'a Dioscøxpä nebiä Jesucristo chaächpøjquiän, mänitä

Dios hajxy møj jaančh xpiädaacämät näguipxy mөөdä Jesucristo.

¹⁸ Hөөчh jaduhñ mänaamb coo hajxy yaa weeñtiä nd-saačhpójcäm hädaa yaabä naaxwiin. Pero cab jaduhñ ñä'ägädä mäbaady ni weeñtiä nebiä Dios ja'a hoyhajtä weenhajt hajxy jim xmio'owáañäm maa je'e wyiinduumän. ¹⁹ Tijatiä Dios yaa tөө quiunuu'xy hädaa yaabä naaxwiin, jia wi'i jibhijxyp hajxy jaduhñ coo yhabáadät coo ja'a Dios ja'a hoyhajtä weenhajt mio'owa'añ pönjaty jaduhñ yhuunghajpy. Mänitä Dios jaduhñ miäna'ana'añ coo hajxy nga'a tsaáčhpögáañänä. ²⁰⁻²¹ Coo ja'a Adán jaduhñ jecy jawyiinhajt quiädiehčohñ, ja'a hajxy jecy nhaphajt ndeedyháltämbä, paadiä Dios ja'a tsө'ty ja'a häyohn yaa quiejxy hädaa yaabä naaxwiin. Mäduhñtiä Dios yaa tөө quiunuu'xy cөxiä hädaa yaabä naaxwiin, cөxaamb jaduhñ quiuhdägoyya'añ. Pero cabä pojpa hajxy tii miөөdä. Ca'a jie'eguiөxpä ja'a Dios ja'a tsө'ty ja'a häyohn yaa quiejxy. Hix, jagooyyä jäya'ay pojpa cädieey hajxy miөөdä, paadiä Dios tsө'ty häyohn yaa quiejxy. Jéquiänä Dios jaduhñ wyiinmaayy coo cөxiä wiinä chaačhpögät näguipxy mөөdä jäya'ayhajxy, tijatiä Dios yaa tөө quiunuu'xy, hөxtä coonä yhabáadät coo ja'a Dios hajxy xquia'a yajtsaačhtiunáañänä. Mänitä Dios ja'a hoyhajtä weenhajt hajxy nägөxiä xmio'owáañäm, hөjts Dioshuung, näguipxy mөөd tijaty ja'a Dios yaa tөө quiunuu'xy. ²² Hix, tijatiä Dios yaa tөө quiunuu'xy hädaa yaabä naaxwiin, jia wi'i jibhijxyp hajxy jaduhñ coo yhabáadät coo ja'a Dioshuung ja'a hoyhajtä weenhajt hajxy mio'owa'añii. Tөyhajt jaduhñ. Pero cahnä yhabaady, jaančh tehñ chaačhpөjp hajxy jaduhñ. ²³ Jaanä jaduhñ hөjtsháltämbä, jaduhñ hөjts ndsaačhpójcämbä, jaduhñ hөjts nja wi'i jibhíxämbä coo yhabáadät coo ja'a Dios hajxy pedyii xmio'owáañäm ja'a hoyhajtä ween-

hajt. Coo Dios hajxy xyhuunghájtäm, paady hajxy jaduhñ xmio'owáañäm. Mänitá Dios ja'a hawiinjemybiä ni'xcopc xmio'owáañäm, ja'a mänaa ca'a ma'p ca'a tägoobiä. Coo ja'a Dios ja'a yhEspíritu hajxy tøø xyanäguéjxäm, jaduhñä tøyhajt hajxy nmøødhájtäm coo ja'a Dios hajxy xjiaançh huunghájtäm. Jaaná jaduhñä tøyhajt hajxy nmøødhájtämbä coo ja'a Dios ja'a hoyhajtä weenhajt hajxy pedyii xmio'owáañäm. ²⁴ Coo ja'a Diosmädia'agy hajxy tøø nmäbójcäm ja'a Jesucristocøxpä, paady hajxy nnähwaats nguhwáatsäm, paadiä Dios hajxy xmiøødhíjtänä tu'ugjoot tu'ugwiinmahñdy. Y paady hajxy nja wi'i jìøbhíjxäm coo yhabáadät coo ja'a Dios hajxy xmio'owáañäm ja'a hoyhajtä weenhajt cøxiä. Cahnä yhabaady, paady hajxy nja wi'i jìøbhíjxämnä. Coo häxøpy tøø yhabaatnä, cab hajxy häxøpy njøbhíjxänä. ²⁵ Coo hajxy hamuumdu'joot nmäbójcäm coo ja'a Dios hajxy tøyhajt xmio'owáañäm tijaty hajxy xyajmädsójcäm, paady hajxy tsøc mee'xtújcäm mäduhñtiä hajxy yaa njaac jøbhíjxäm, hoy hajxy nej nja jajt nja habéjtäm.

²⁶ Y xpiuhbéjtämä Dioshespíritu hajxy nebiaty hajxy hamdsoo nga'a jadaañäm. Hiç, coo ja'a Dios hajxy naxy nja wi'i pia'ya'axáañäm, cab hajxy naxy nnajuøøyyäm tijatiä Dios hajxy nmäyujwáañämb, waambatiä Dios hajxy nmänuu'xtáacämät. Naxy hajxy jaduhñ njájtäm coo ja'a capxy ja'a mädia'agy hajxy hoy xquia'a habädsømáañäm. Nä'ä møcxéjjäm nä'ä ho'ogyxiéjjäm hajxy jaduhñ. Pero coo hajxy nga'a najuøøyyämät nebiä Dios hajxy nmänuu'xtáacämät, mänitá Dioshespíritu hajxy xpiuhbéjtämät. ²⁷ Piuhejpiä Dioshespíritu pønjatiä Diosmädia'agy tøø miäböcy. Hoorä, ñajuøøbiä Dioshespíritu jaduhñ waambatiä Dios jioot chocy coo ja'a Dios hajxy nmänuu'xtáacämät. Jaduhñä Dioshespíritu hajxy xyajxiic xyajmädiáacäm ja'a ngopcootyhájtäm. Y ñajuøøbiä Dios

jaduhñ waambaty hajxy nxiic nmädiáacäm ja'a ngop-cootyhájtäm.

²⁸ Hoorä, cab hajxy njootmayhájtämät coo Dios ja'a tsaächpä peenä hajxy xmióoyyämät. Haa ca'a, nna-juóoyyäm hajxy jaduñ coo Dios quiøxy najuø'øý nebiaty hajxy njajt nhabéjtäm, pønjatiä Dios tsojp. Nnajuóoyyäm hajxy jaduñ coo Dios wyiinmay coo hajxy ween xy-hoyóoyyäm cøxiä wiinä. Tøø hajxy xyajnáhdíjjäm coo hajxy njäya'ayhájtämät nebiä jioot choquiän. Jaaná jaduñ hajxy xyhawáañämbä cooc hajxy xyhuunghadáañäm.

²⁹ Hiñ, jéquiänä Dios yhuuc najuøøbiä pønjatiä miädia'agy hánajty mäbøgáañäxäp. Je'ehajxy jaduñ yajnáhdíjjä coo hajxy yhojiäya'ayhádat nebiä Jesucristo yhojiäya'ay-hatiän, ja'a Dios yHuung. Jaduhñä Dios hajxy nägøxiä xyhixáañänä nebiä Jesucristo yhuchän. Højts jaduñ xñänøømäm coo Jesucristo hajxy nbuhya'ayhadáañäm, je'eguiøxpä coo Dios hajxy xyhuunghájtäm. ³⁰ Coo Dios hajxy jecy xyajnáhdíjjäm coo miädia'agy hajxy nmäbøjcämät, paady hajxy tøø xyhawáañäm cooc hajxy xyhuunghadáañäm. Y coo miädia'agy hajxy jaduñ tøø njaançh mäbøjcäm, mänit hajxy xpiädáacäm hawa'ad-stuum. Jaduhñ tøø miänaambä coogä cuhdujt hajxy nmøødhadáañäm nebiä Jesucristo miøødän.

³¹ Homiädoonä hädaa mädia'agy, túhmäts. Coo Dios hajxy jecy xyajnáhdíjjäm coo hajxy xyhuunghájtäm, ni pøn jaduñ xquia'a yajtu'udägóoyyämät. Tøyhajt jaduñ coo Dios yajtøjiada'añ tijaty tøø wyiinmay ja'a højtsøx-phájtäm. ³² Xjiaançh tehñ chójcämä Dios jaduñ. Høxtä ñähdujc ja'a yhamdsoo Uung coo hajxy hoy xñäh-ho'túutäm nägøxiä. Jaançh tehñ miøjjä Dios mayhajt jaduñ tiuñ ja'a højtsøxphájtäm. Jaduhñä tøyhajt hajxy nmøødhájtäm coo ja'a mayhajt jaduñ tehngajnä jiaac tuna'añ. ³³ Coo Dios hajxy tøø xyajnáhdíjjäm coo

miädia'agy hajxy nmäbójcämät, paady hajxy pøn hoy xquia'a näxø'øwø'øwáanäm maa Dioswiinduumän. Haa ca'a, tøø Dios hajxy xpiadáacäm hawa'adstuum. ³⁴ Ni pøn hajxy jadhñ hoy xquia'a päda'agáanäm haxøøgtuum. Haa ca'a, jimä Jesucristo hajxy xñähgapxtúutäm Dioswiinduum. Ja'a Dios yhahooyhaambiä Jesucristo yhäna'ay. Møj jaançh jim yhity. Paady hajxy jim xñähgapxtúutäm, coo hajxy hoy tøø xñähho'túutäm, møød coo hoy tøø jiuypiojtägach. Jadhñ hajxy tøø xyajnáhwaats tøø xyajcuhwáatsäm. ³⁵ Xjiaançh tehñ chójcämä Jesucristo hajxy jadhñ nägø'ø nädecypiä. Nnäl'ägädä møødhájtämä tøyhajt hajxy jadhñ coo hajxy mänaa xquia'a nähgue'egáanäm, hoyyä tsaachpä peenä hajxy cu nja páatäm, hoy hajxy pøn cu xjia tsaächtiúunäm ja'a Diosmädia'agyquiøxpä, hoyyä yuu hajxy cu xjia páatäm, hoyyä wit tucxy hajxy cu nja yajmaajiájtäm, hoy hajxy mäjahnñdiuum cu nja wädíjtäm, hoyyä cahwiindøyhäna'c hajxy cu xjia yaghó'cäm. ³⁶ Jadhñ jim myiñ cujaay maa Diosmädia'aguian:

Xøømdsuhñ højtsä cahwiindøyhäna'c xjia wi'i yagho'oga'añ ja'a miiçh mmädia'agyquiøxpä;
 ho'cøøc højts xñäl'ägädä wa'ana'añ,
 nõmä Dios ñämaayyä.

³⁷ Hoy hajxy jadhñ cu nja jajt, hoy hajxy jadhñ cu nja habéjtäm, nnäl'ägädä mee'xtugáanäm hajxy jadhñ. Ja'a Jesucristo hajxy jadhñ xñäl'ägädä puhbéjtäm, je'eguiøxpä coo hajxy xjiaançh tehñ chójcäm. Naamgahnä hajxy tii xjiájtäm xyhabéjtäm, jadhñä Jesucristo hajxy maas hoy nbanócxämät hamuumdu'joot. ³⁸⁻³⁹ Coo Dios hajxy xjiaançh tehñ chójcäm, jadhñä tøyhajt hajxy njaançh tehñ miøødhájtäm coo Jesucristo hajxy tehngajnä xñäl'ägädä puhbedáanäm, hoy ñejpiä hajxy cu nja jajt cu nja habéjtäm, hoy yhädaa yaabä

naaxwiinä, hoy hajxy cu nja hó'cäm, hoy hajxy cu nja tägóoyyäm, hoy hajxy cu nja jaac jugyhájtäm, hoy hajxy cu nja jaac tsuxc-hájtäm, hoyyá mójcuhdujtmøødpädøjc hajxy cu xjia mädsiphájtäm, ja'a pojhajpä täxa'ahajpä, hoyyá mójcu'ugong hajxy cu xjia mädsiphájtäm, hoy miaajä hajxy jia hity, hoy yhädaa yaabä naaxwiinä, hoy jyim tsajpootypä, hoy jyiiby mójcu'uhaamä. Pero cabä cuhdujt hajxy ñä'ägädä møødä maa Jesucristocøxpän, ja'a hajxy nWiindsøn'hájtämbä. Paadiä Jesucristo hajxy homiänaajä xchójcäm; paady hajxy homiänaajä xcwieendähájtäm.

9

¹⁻³ Jaanč tehñ jiootmayhájpøčhä judíoscøxpähajxy je'eguiøxpä coo hajxy quia'a mäbøga'añ coo ja'a Jesucristo hajxy tøø ñähho'tu'udyii. Høøch nmägunaaxhajxy je'e. Jaanč tehñ chaačhóøbiøch njoot jaduhñ coo hajxy quia'a mäbøga'añ. Tøyhøch jaduhñ nmädi-a'agy. Coočhä Jesucristo nmøødhity tu'ugjoot tu'ugwiinmahñdy, jaduhñä tøyhajt hajxy mmøødhádät cooçh nga'a høhñda'agy. Ja'a nhamdsoo juøhñdyháamhøch jaduhñ nnajuø'øy cooçh nga'a høhñda'agy, møød coo Dioshespíritu jaduhñ miänaambä. Jaanč tehñ chaačhóøbiøch njoot jaduhñ cooçhä nmägunaaxhajxy quia'a mäbøga'añ; høxtä cu nja nähhádaactu'udáanhøch hajxy jiiby haxøøgtuum coo Dios jaduhñ cu miänaañ. Jadúhñhøch nmäna'ana'añ cooçhä Jesucristo cu xquia'a yajnähwaach, pero cooçhä nmägunaaxhajxy cu yajnähwaatsä. Hoorä, ja'a Israel, højts nhap ndeedy hijty je'e jegyhajty. ⁴ Jéquiänä Dios ja'a Israel miøødyajcuhdujcy coo Israel yhap yhoc-hajxy hánajty piuhbedáanäxä. Jaanč huung-hajtä hajxy je'eduhñ ja'a Diósäm. Je'eduhñ ñänøømby coo hajxy jaduhñ quiu'ughajtä ja'a Diósäm. Yhiix hajxy

jaduhñ coo Dios ja'a miäjaa yajcähxø'cy jim mädøyyä maa Diostøjcän. Jaduhñ hänajty quiähxø'øgy nebiä jocän. Mänitä Dios hajxy yhanehmä madiu'u. Mänitä Moisés quiujahy nebiatiä Dios hänajty tøø yhane'emiän. Mänitä Dios cuhdujt yejcy nebiatiä Dios hajxy jaduhñ jim wyiingudsähgø'øwät. Mänitä Dios tøyhajt yejcy coo ja'a yajnähwaatspä hajxy hänajty yajnäguexa'añii. Cooch jaduhñ nnänømy coo hajxy yhaphaty yhoc-hadyii ja'a Israel, højts jaduhñ niñänømöp, højts judíoshajxy. ⁵ Højtsä jecyjiäya'ay nhaphajt ndeedyhajt, ja'a Abraham møødä Isaac møødä Jacobo. Cumaayyä ja'a jecyjiäya'ayhajxy jaduhñ ja'a Diósäm. Y coo Cristo yaa hoy jiäya'ayhaty hädaa yaabä naaxwiin neby højtshájtäm, jaaná jaduhñ je'e yhaphájtäbä yhoc-hájtäbä ja'a Israel. Dioshajpä Cristo. Cøxiä wiinä je'eduhñ yhane'emy homi-aajä. Tsøc hajxy wiingudsähgø'øyyäm homiänaaxøjjä coo miøjjä coo jiaančhä. Tøyhajt jaduhñ.

⁶ Cooch nmäna'añ coochä nmägunaaxhajxy quia'a mábøga'añ coo Jesucristo hajxy tøø xñähho'túutäm, cábøch jaduhñ nmäna'ana'añ cooc tyijy ja'a Dios ja'a miädia'agy tøø quia'a yajtøjiaty coo jecy miänaañ coogä Israel yhap yhoc-hajxy hänajty yajnähwa'adsa'añii. Hix, coo Dios ja'a Israel jecy ñämaayy coo yhap yhoc-hajxy hänajty yajnähwa'ads yajcuhwa'adsáañäxä, cabä Dios hänajty miäna'ana'añ cooc tyijy hajxy hänajty nägøxiä ñähwa'ads quiuhwa'adsa'añ. Jue'e hänajty ñänømby pønjaty mábøjp coo Dios yajtøjiaty waambaty tøø quiapxy tøø miädia'agy. Hix, cabä Israel yhap yhoc-hajxy nämay miäböcy coo hajxy tøø ñähho'tu'udyii ja'a Jesucristäm. Pønjaty jaduhñ mábøjp, je'eds hajxy jaduhñ tøyhajt haphájtäp hoc-hájtäp ja'a Israel. Pønjaty jaduhñ ca'a mábøjp, cab hajxy tøyhajt yhaphaty yhoc-hadyii ja'a Israélm. ⁷ Jaaná jaduhñä Abraham ja'a yhuunghajxy

je'ebä. Tu'uquiiä jaduhñ ñänøømä ja'a Diósäm coo hoyhajt weenhajt hánajty mio'owáanäbä nebiä Abraham hánajty mio'owa'añiiñän. Ja'a Abraham ja'a yhuung tu'ugpä, cab je'e jaduhñ ñänøømä coo tii mio'owa'añii. Jaduhñ jim myiñ cujaay maa Diosmädia'aguiän: “Ja'a miičh mhuung Isaac, je'e yhap yhoc-høch jaduhñ nhixáanäp nej miičh mhäp nej miičh mhocän”, nømä Dios ja'a Abraham jecy ñämaayy. ⁸ Jaduhñä tøyhajt hajxy nmøødhájtäm coo Isaac yhap yhoc-hajxy quiu'ughájtäxä ja'a Diósäm. Paadiä Isaac yhap yhoc-hajxy jaduhñ quiu'ughájtäxä ja'a Diósäm coo Abraham jecy yhawaañä coo tio'oxiøjc hánajty yhuungpaada'añ. Coo ja'a Abraham jaduhñ yhawáanäxä, tøø ja'a Sara hánajty miäjay, y cabä yhuung hánajty ni tu'ugtä. ⁹ Hix, cahnä Sara hánajty yhuungpaadyñä, tóøyyämä Dios ja'a Abraham hánajty jaduhñ ñäma'ay: “Coo jaduhñ yhabáadät, mänit miičh mhixa'añ coočhä nmädia'agy nyajtøjiada'añ. Co'na'awaambä mdo'oxiøjc Sara. Ya'ayhäna'c jaduhñ minaamb ca'awaamb”, nømä Dios ja'a Abraham jecy ñämáaguiumbä. Ja'a Isaac jaduhñ nänøømä coo hánajty myina'añ quia'awa'añ.

¹⁰ Jaanä jaduhñä Rebécabä, ja'a Isaac tio'oxiøjc, coo je'e quio'naabiä, mänitä pigána'c-hajxy myiiñguiahy tähoocechpä. ¹¹⁻¹² Cahnä Rebeca hánajty quio'na'ayñä, tóøyyäm hánajty ñäma'ayii ja'a Diósäm coo ja'a Jacobo ja'a Esáú hánajty yhane'ema'añ, hoyyä Esáú jayøjp jia mejch, hoyyä Jacobo jia jaac tehñ miejch høxhaam. Paadiä Dios jaduhñ miänaañ, tóøyyäm hánajty wyiinmahñdyhaty coo Jacobo yhap yhoc-hajxy hánajty quiu'ughadáanäxä ja'a Diósäm, møød coo Esáú yhap yhoc-hajxy hánajty jaduhñ quia'a cu'ughadáanäxä, hoy hánajty quia'a jagä cähxø'øgyñä pø hoyhäna'c-hadaambä Rebeca yhuunghajxy hánajty, pø caj. Hix, hamdsoojootä Dios jaduhñ wyiinmahñdyhajty nebiä Jacobo hánajty

yhixa'añ, nebiä Esau hänäjty yhixa'añ. ¹³ Jaduhñ jim myiimbä cujaay maa Diosmädia'aguiän: “Ndsójc-höchä Jacobo mөөdä yhap mөөdä yhoc-hajxy, páadyhöch hajxy nnäxuudsa'añ. Pero ja'a Jacobo yhajch, ja'a Esau, cáböch je'e nnäxuudsa'añ. Ni cáböchä yhap yhoc-hajxy jaduhñ nnäxuudsáanäbä”, nömä Dios cujecy miänaañ.

¹⁴ Pero cab hajxy hawiinmats waamb nmänáanämät cooc tyjy Dios hoy quia'a wiinmahñdyhajty coo miänaañ coogä Jacobo yhap yhoc-hajxy hänäjty piuhbedáanäxä, mөөd coogä Esau yhap yhoc-hajxy hänäjty quia'a puhbedáanäxä. Caj pues. Haa ca'a, hoyyä Dios jaduhñ wyiinmahñdyhaty homiänaaxøjä. ¹⁵ Hiç, jaduhñä Dios ja'a Moisés jecy ñämaayy: “Nnäxúu'chpöch nba'häyóobiöch pönjátyhöch njoot chojpy coöch jaduhñ nnäxúudsät, coöch jaduhñ nba'häyówät. Cáböch nnäxuudsa'añ pönhöch njoot quia'a tsojpy coöch nnäxúudsät.” ¹⁶ Coo Dios jaduhñ miänäxuučh, jaduhñ hajxy nyajnajuóyyäm coo hojioot jiaančh tehñ miөөdä. Hamdsoo ñägapxy pøn ñäxuudsamby. Hamdsoojoot jaduhñ miänäxuučh, caj jie'eguiøxpä coo hajxy cu nja nämáayyäm coo hajxy ween xñäxúu'tsä, coo hajxy ween xpia'häyóowäm. Ni quia'a je'eguiøxpä coo njoot hajxy nbadáacäm coo hajxy hoy njäya'ayhájtämät. ¹⁷⁻¹⁸ Hiç, ñäxuu'chpä Dios pøn ñäxuudsamby. Jaanä jaduhñduhmbä, yajnähdiipiä Dios coo quiopc-hajxy xiéxät pønä Dios jaduhñ yajmädsøjpy coo quiopc-hajxy jaduhñ xiéxät. Jaduhñä Dios ja'a gobiernä ja'a quiopc jecy yajxejxä, ja'a hänäjty jim hanehmbä Egiptonaaxooty. Tøyhajt jaduhñ. Haa ca'a, jaduhñ jim myiñ cujaay maa Diosmädia'aguiän coo Dios ja'a gobiernä jaduhñ ñämaayy: “Páadyhöch miičh tөө nyajmøjtägø'oy, tөөčh hänäjty nwiinmay coöchä nmäjaa hänäjty nyajcähxø'oga'añ maa mijts mnaax maa mijts mgajptän. Coöch ngu'ug jim

nhøxwoobädsómät maa mijts mnaax̄ maa mijts mgajptän, jaduhñhøch nmäjaa njaančh tehñ yajcähxø'øga'añ. Jaduhñä mädia'agy wiädita'añ wiinduhmyhagajpt ja'a høøčhcøxpä cooçh njaančh tehñ miøjjä cooçh njaančh tehñ jiaančhä”, nømä gobiernä jecy ñämaayyä.

¹⁹ Jii häna'c-hajxiäda'a näje'e miäna'ana'añ: “Cabä Dios wyiinmahñdy yhooyä je'eguiøxpä coo hajxy xñäxø'øwøøyyäm cooc højts pojpä cädieey nmøødhájtäm. Haa ca'a, hamdsoo højts ngopc tøø xyajxéjxäm. Paady højts pojpä cädieey nmøødhájtäm.”

²⁰ Pero cab jaduhñ yhahixø'øy coo pøñ jaduhñ miäná'anät. Tøyhajt jaduhñ. Caj pues. Haa ca'a, yaa hajxy njäya'ayhájtäm. Cabä cuhdujt hajxy nnä'ägädä møødhájtäm ni weeñtiä coo Dios hajxy nhadsóowämät. Hix, jaduhñ mäwíinäts højts Dios xyajnáhdíjjäm nebiä tu'tspojtspädøjc-hajxy piochän nebiä jioot hajxy yajmädsoquiän. Coo tu'ts quiapxø'øgät, cabä pojtpä hawiinmats ñämá'awät: “Tiičh yajxón coo xquia'a pojch.” Caj pues, cab jaduhñ yhahixø'øy coo tu'ts jaduhñ miäná'anät. ²¹ Haa ca'a, miøødä tu'tspojtspädøjc cuhdujt hajxy jaduhñ coo tu'tsnaax̄ hajxy yajtúnät nebiä jioot hajxy yajmädsoquiän. Pø chojpiä jioothajxy jaduhñ coo tsowdu'ts hajxy piódsät, pues miøødä cuhdujt hajxy jaduhñ coo hajxy jaduhñ piódsät. Y pø chojpiä jioothajxy jaduhñ coo cuhga'aybä hajxy piódsät, jaduhñä cuhdujt hajxy miøødäbä coo hajxy jaduhñ piódsät. Jaduhñ mäwíinädsä Dios cuhdujt miøødäbä coo hajxy xyajnáhdíjjämät nebiä jioot choquiän. Coo jioot jaduhñ chógät coo hajxy xpiädáacämät hawa'adstuum, pues miøødä cuhdujt jaduhñ coo hajxy jim̄ xpiädáacämät. Y coo jioot jaduhñ chógät coo hajxy xpiädáacämät haxøøgtuum, jaduhñä cuhdujt miøødäbä coo hajxy jaduhñ jim̄ xpiädáacämät.

²² Y jaanä jaduñnä Dios cuhdujt mióødäbä coo jaduñ miee'xtujcy ja'a cahwiindøjiäya'aguiøxpä. Mióødä Dios cuhdujt jaduñ coo ja'a cahwiindøjiäya'ayhajxy yajcumä-dowóøjät. Pero cab hajxy choj cumädowa'añ, hoy hajxy tøø jia cädieey hanaxiä. Hawiinmats hit jaduñ coo hajxy paquiä quiumädówät. Y coo Dios hānajty yajcumädowa'añ ja'a quiädieeguiøxpāhajxy, hijxtahñdä Dios jaduñ yajcāhxø'øgaamby coo mājaa mōc mióødä. Jaduñ yajcāhxø'øgaambä coo haxøøghāna'c-hajxy tehñ-gajñä quia'a mee'xtuga'añii. ²³⁻²⁴ Coo Dios jaduñ jecy wyiinmahñdyhajty coo haxøøghāna'c yajcumädowa'añ, paady jaduñ wyiinmahñdyhajty neby højts jaduñ hoy nwiinjuóøyyämät coo jaduñ yhawiinmatsä coo haxøøghāna'cä quiädieey hajxy quiumädówät. Jaanä jaduñduhmbä, paadiä Dios jāya'ay näje'e quia'a yajcumädoy, je'eguiøxpä coo hajxy ñāxuučhii ja'a Diósām, hoy hajxy hānajty tøø jia cädieey. Jequiän hajxy jaduñ yajñāhdijjä coo hajxy jim ñōcxät Dioswiinduum. Højts jaduñ xñānōømām coo Dios hajxy tøø xyajñāhdijjām coo hajxy jim xyajñōcxāñām wyiinduum, pønjaty hajxy tøø xyajwiinwaañōøyyām coo hajxy xyhuunghadāñām, mōødä judíosahajxy, mōødä cajpä judíosahajxy. Jaduñ hajxy nwiinjuóøyyām coo Dios møjmayhajt tøø tiuñ maa højtsōxphájtām, mōød coo hojioot jiaanč tehñ mióødä.

²⁵ Maa Oseas nocy jecy quiujahyyän, jaduñ jim myiñ cujaay coo Dios jaduñ miānaañ:

Yø'ø jāya'ayhajxy cajpä judíos, cábøch hijty ngu'ughaty. Cábøch hijty ndsocy. Pero tøøch nyajñāhdijnä coo ch ngu'ughadāñnä. Ndsójñābøch jaduñ.

²⁶ Wiingtuum miānāngumbä: “Cábøch mijts hijty ngu'ughaty.”

Pero jaduñhajtøch mijts nhuunghadañnä, homiaajä hajxy mhity,

nõmä Dios miänaañ. Homiänaajä Dios yhity. ²⁷ Y ja'a Isaías, jaduñ je'e jecy quiujahy: “Yø'ø judíoshajxy, hoy hajxy jaduñ jia nämayyā nebiä tsäbiu'ujän, näweñtiä hajxy jaduñ cho'oga'añ. ²⁸ Ja'a jäya'ayhajxy yaa cädiehbiä hädaa yaabä naaxwiin, mobädajpä hajxy yajcumädowa'añii ja'a Diósäm. Tähooc-yajcumädoybä hajxy yajcumädowa'añii hoyhoy.” ²⁹ Jaanä jaduñä Isaías jecy miädiáaccumbä ja'a judíosçxpähajxy:

Cøxiä wiinä Dios yhane'emy homiaajä. Coø højtsä Dios häxøpy tøø xquia'a näxú'utsäm, tøø højts häxøpy ngøxy cuhdägooyäm, nebiä jäya'ayhajxy jecy quiuhdägooyän, ja'a hajxy hijty jegyhajty tsänaabiä maa cajpt hijty xiøhatiän Sodoma møød Gomorra.

³⁰ Nébiøch cham tøø ngujaayän, jequiän højtsä Dios xyajñahdijy coø højts hānajty xquiuhghada'añ, højts judíosajpä. Pero, ja'a jäya'ayhajxy cajpä judíos, cabä Dios hijty je'e ñāxuuč. Ni ja'a jäya'ayhajxy hijty quia'a näxú'utsäbä, ja'a hajxy hānajty ca'a tajp ca'a maabiä maa ñāhwaatstaact hajxy piáadät. Pero cahnä jiegø'øy coø mädia'agy hajxy tøø miädoonä coogä Dios ja'a Jesucristo yaa quiejxy, cooc ja'a Jesucristo hajxy hoy xñähho'túutäm. Coø hajxy jaduñ miädooy, näje'e hajxy miäbøjcy; paady hajxy tøø ñāhwa'ačh, paady hajxy tøø quiuhwa'ačh. ³¹⁻³² Pero yø'ø judíoshajxy, jadúñäc tyijy hajxy hijty ñāhwa'adsa'añ je'eguiøxpä cooc tyijy hajxy hoy quiudiuñ nebiä Moisés jecy quiujahyyän. Pero cab hajxy jaduñ ñä'ä nähwaach je'eguiøxpä coø tøyhajt hajxy quia'a møødä coø Dios miäyajñahwa'ačh je'eguiøxpä coø hojioot miøødä, ca'a jie'eguiøxpä coø jäya'ayhajxy hoy jia wi'i jjäya'ayhada'añ. Paadiä judíosajxy quia'a nähwaach je'eguiøxpä coø hajxy quia'a mäbøjcy coø højtsä Jesucristo xñähho'túutäm. Jaduñ mäwiin hajxy

jiaty nebiä häna'c quiuhnepiän tsaanähgøxp päyø'cujc. Cab hajxy ñä'ägä mech maa hajxy hänajty jia wi'i ñøcx-a'añän. ³³ Tóøyyämä Dios hänajty ñajuø'øy coo judíoshajxy hänajty quia'a mábøga'añ coo Dios ja'a Jesucristo yaa quiejxy hädaa yaabä naaxwiin. Jimä cajpt tu'ug xiøhaty Sión. Jimä judíoshajxy chäna'ay, ja'a Dios quiu'ughajpiä. Jaduhñ jim myiñ cujaay maa Diosmädia'aguiän:

Jímhøch ngu'ug chäna'ay maa cajpt jaduhñ xiøhatiän Sión.

Jímhøchä tsa tu'ug nbäda'aga'añ, weenä jäya'ayhajxy jim quiuhnepy maa tsaajän, ween hajxy jim quiä-day.

Ja'a Jesucristo jaduhñ mäbaat neby yø'ø tsaajän. Hix, pøn jaduhñ ca'a mábøjp coo højtsä Jesucristo hoy xñähho'túutäm, jaduhñ je'e miäbaady nebiä häna'c cuhnejpän. Quiumädownaamby je'e. Pero pøn jaduhñ jaançh mábøjp ja'a Jesucristocøxpä, je'eds hodium päda'agáanäp.

10

¹ Mägu'ughajpädøjc, jia tsójpiøch njoot jaduhñ coo judíoshajxy ñähwá'adsät. Jaduhñhøchä Dios nja pa'ya'axy jaaya'aguiøxpä. Haa ca'a, judíohájpøch høøchpä. ² Jia wi'i quiudiunaambiä Diosmädia'agy hajxy. Tøyhajt jaduhñ. Pero cabä Diosmädia'agy hajxy hoy wyiinjuø'øy. ³ Hamdsoo hajxy jia wi'i yajniñhwa'adsa'añii yhamdsoo cuhdujtcøxpä. Hix, cab hajxy jaduhñ wyiinjuø'øy tiiguiøxpä Dios ja'a jäya'ay piäda'agy hawa'adstuum. Paady hajxy jim piäda'agyii coo Dios ja'a miädia'agy hajxy miäbøjcä coo hajxy jaduhñ ñähwa'adsa'añii. ⁴ Pønjaty mábøjp coo hajxy tøø ñähho'tu'udyii ja'a Jesucristäm, je'edsä Dios ñäxuu'chp. Coo Jesucristo hajxy cu xquia'a nähho'túutäm, ngumädownaanäm hajxy hijty, je'eguiøxpä

coo jecymiädia'agy hajxy tøø nga'a cudiúunäm, ja'a Moisés jecy quiujáhyyäbä. Ja'a Jesucristo mäbøcypiä, ca'xiä jecymiädia'agy quiudiuuñ, ja'a Moisés jecy quiujáhyyäbä, nebiä Dios hänajty tøø yhane'emiän. Jaančh tehṃ yhooyä Jesucristo jaduhñ yhäna'c-hajty. Cabä pojpä cädieey hänajty ñä'ägädä møødä ni weeñtiä. Paady hijty jaduhñ quia'a hahixø'øy coo jaduhñ cu yho'cy. Pero coo ja'a Jesucristo hajxy hoy xñähho'túutäm, paady yø'ø jecymiädia'agy hajxy jaduhñ xquia'a hanéhṃänä, ja'a Moisés jecy quiujáhyyäbä.

⁵ Jaduhñä Moisés jecy quiujahy coo judíoshajxy pedyii quiudiúnät nebiaty hänajty tøø quiujaay. Jaduhñägä hoy-hajtä weenhajt hajxy piáadät. ⁶ Coo hajxy nmäbøjcämät maa Jesucristocøxpän, jaduhñä hoyhajtä weenhajt hajxy nbáatämät. Ja'a Diosmädia'agy jaduhñ mänaamb. Pero cab hajxy ndaj nmáayyämät: “Pøñ jim nõcxäp tsajpootyp coo yajnähwatspä wiomänácät.” ⁷ Ni jaduhñ hajxy nga'a taj nga'a máayyämbät: “Pøñ jiiby hädá'ägäp møjcu'uhaam coo ja'a yajnähwatspä wiobédät, jiiby maa ho'ogyjiäya'ay yháañämähajxy yhitiän.” Paady hajxy jaduhñ nga'a taj nga'a máayyämät je'eguiøxpä coo Jesucristo yaa tøø yhoonä hädaa yaabä naaxwiin, coo hajxy hoy tøø xñähho'túutänä, møød coo jadähooc jiuypiojtä-gajch. Hiṁ, jaduhñ hajxy tøø xyajnähwat tøø xyajcuhwáatsäm. ⁸ Nägooyyä hajxy jaduhñ nmäbøjcämät coo Jesucristo hajxy tøø xñähho'túutäm, jaduhñ hajxy nnähwáatsämät. Cab hajxy jaduhñ pøñ xñämáayyämät coo nähwaatstaact hajxy wiingtuum nhøxtáayyämät. Cab hädaa mädia'agy jaduhñ ñä'ägä tsipä. Howyiinjuøønä hädaa mädia'agy jaduhñ. Jaduhñ højts nnä'ägä yajnähixø'øy-haty. ⁹ Coo hajxy mejtstu'u ngudiúunämät, mänit hajxy nnähwáatsämät. Je'ečh jaduhñ nnänøømby mejtstu'u, coo hajxy nnägápxämät cu'ughagujc coo Jesucristo

hajxy nWiindsøn_hájtäm, møød coo hajxy nmäbójcämät hamuumdu'joot coo Dios ja'a Jesucristo yagjujypiøjtägajch mänaabä hänäjty tøø yho'oguiän. Coos Dios ja'a Jesucristo jaduñ yagjujypiøjtägajch, jaduñ hajxy nnajuóyyäm coo Dios ja'a Jesucristo quiumay, møød pønjaty ja'a Diosmädia'agy mäbøjp ja'a Jesucristocøxpä. ¹⁰ Coos hajxy jaduñ nnä'ägä mäbójcämät hamuumdu'joot, jaduñä Dios hajxy xquiumáyyämät. Y coo Jesucristo hajxy nmädiáacämät cu'ughagujc coo hajxy nWiindsøn_hájtäm, mänit hajxy nnähwáatsämät.

¹¹ Jaduñä Diosmädia'agy miäna'añ: “Pøn jaduñ jaančh mäbøjp ja'a Jesucristocøxpä, je'eds jaduñ päda'agáanäp hodium ja'a Diósäm.” ¹² Hix, tu'cuñdujt højtsä Jesucristo xyhíjxäm, møødä judíoshajxy, møødä ca'a judíoshajxypä. Tu'cuñdujt højtsä Jesucristo jaduñ xyhuunghájtäm. Coos højtsä Jesucristo nba'yáaxämät coo nbojpä ngädieey hajxy xyajnähwáatsämät, tsipcøxp højts jaduñ xñäxúu'tsämät, tsipcøxpä mayhajt jaduñ tiúnät maa højtscøxphájtäm. ¹³ Jaduñä Diosmädia'agy miänáangumbä: “Pønä Jesucristo pa'yaaxp, hodium je'eduhñ piäda'aga'añii ja'a Diósäm.” ¹⁴ Pønjaty ca'a mädoobnä ja'a Jesucristocøxpä, cabä Jesucristo hajxy jaduñ hoy miänuu'xta'aga'añ. Tøyhajt jaduñ. Pø cahnä hajxy jaduñ miädoyhaty coogä Jesucristo hajxy tøø xñähho'túutäm, cab hajxy hoy miäbøga'añ. Pø cahnä hajxy jajwiingapxø'yii ja'a Jesucristocøxpä, cab hajxy hoy miädowa'añ. ¹⁵ Ja'a Diósädsä cugapxy quejx coo ja'a miädia'agy jajwá'xäxät maa jäya'ayhajxiän, ja'a cahnä hajxy hänäjty miädoybä. Jaduñ jim myiñ cujaay maa Diosmädia'aguiän: “Pønjatiä Diosmädia'agy tøø miädoy coogä Dios jajnähwa'ačh pønjatiä Dios pa'yaaxp, paady hajxy xioonda'agy coo hajxy jaduñ tøø miädoonä. Jaančh tehñ yhoj jaduñ coo Diosmädia'agy jaduñ wia'xy.”

Romanos 10:16 48 Romanos 10:21

¹⁶ Pero cabä jäya'ayä Diosmädia'agy hajxy nägøxiä tøø miäböcy ja'a Jesucristocøxpä. Jaduhñä Isaías jecy quiujahy: “Dios, tøø miich mmädia'agy nja yajwa'xä, pero cab pøn tøø miäböcy.” ¹⁷ Mayhagajptä Diosmädia'agy tøø wia'xy ja'a Jesucristocøxpä. Tøø jäya'ayhajxy may miädoonä. Näje'e hajxy hoy tøø wyiinjuø'øy. Je'eds hajxy jaduhñ tøø miäböcy. Coø hajxy quia'a mädo'wät, cab hajxy jaduhñ miäböçät.

¹⁸ Hoorä, ja'a judíosahajxy, tøyhajt jaduhñ coø hajxy je'e miädóyyäbä. Haa ca'a, jaduhñ jim myiñ cujaay maa Diosmädiá'aguiänä: “Wiinduhmyhagajptä mädia'agy tøø wia'xy ja'a Dioscøxpä.” ¹⁹ Y jia wiinjuøøyy ja'a judíos ja'a mädia'agy hajxy jaduhñ ja'a Jesucristocøxpä. Pero cab hajxy miäböjcy. Ja'a jäya'ayhajxy ca'a judiöspä, je'eds hajxy jaduhñ mäböjcy. Jaduhñä Moisés jecy quiujahy coogä judiöshajxy ñämaayyä ja'a Diósäm:

Mbejxyp mijts pønjaty ca'a judiöshajpä cóogøch tyijy nga'a cu'ughaty.

Pero ngu'ughadáambiøch hajxy je'e. Jaduhñ mijts mnänømy cooc tyijy hajxy tii quia'a jaty quia'a najuø'øy.

Pero nnäxuudsáambiøch hajxy je'e, paady mijts mjoot-ma'ada'añ, nømä judiöshajxy jecy ñämaayyä. ²⁰ Mänitä Isaías høxhaam jiaac cujahy coogä Dios miänaañ:

Pønjetiä nähwaatstaact hijty ca'a høxtaaby, tøøchä nmädia'agy hajxy xmiäböçcänä.

Cábøch hajxy hijty xyajtøy, pero tøøch hajxy nyajwiinjuøøñä coøch hojioot njaançh tehñ miøødä.

²¹ Jaduhñägä Dios miänáangumbä: “Yø'ø judiöshajxy, tøøch hajxy jaduhñ nja wi'i miänuu'xta'agy coøch nmädia'agy hajxy xmiäböçcät. Pero cab hajxy jaduhñ ñä'ägä

mäbøga'añ. Jaanč tehṃ xiexä quiopcă tiaatsc-hajxy jaduhṃ”, nømä Dios jecy miänaañ.

11

¹ Pero cábøch nmäna'ana'añ coo judíosahajxy tøø ñajtshixø'øyii ja'a Diósäm. Caj pues, caj tiähoochnajtshixø'öyyä; paquiä hajxy ñajtshixøöyyä. Haa ca'a, judíosahjrpøch høøčhpä. Abrahámhøch nhaphajt ndeedyhajt. Y ja'a Benjamínhajpä, møød je'ečh nhaphajty ndeedyhajty. Ja'a Abraham yhap yhoc je'ebä, ja'a Benjamínhajpä. ² Cab højtsä Dios tøø xñajtshixø'øy, højts judíosahjpä. Hix, jequiän højtsä Dios xyajnähdiij coo højts hänajty xqui'u'ughada'añ. Jaduhṃ jim myiñ cujaay maa Diosmädia'aguiän coogä Elías ja'a miägunaax jecy ñäxø'øwøöyy, ja'a judíosahajxy, ja'a Diosmädia'agy hajxy hänajty quia'a mäbøgaambiä. Ja'a Elías, jequiän je'e quiuguexyhajtä Diósäm. Pia'yaaxypä Elías ja'a Dios hänajty coo jaduhṃ miänäxø'øwøöyy: ³“Dios, yø'ø judíosahajxy, haxøøg hajxy tøø jiatcø'øy. Tøø miičh mguguexyhajxy xyagho'că. Tøø tsaamaa'xy hajxy yajma'ady maa animhalho'ogy hajxy hijty ño'oguiän coo miičh hajxy hijty xwyiingudsähgø'øy. Nägøxiä jäya'ayhajxy tøø yagho'ogyii, ja'a miičh hajxy hijty xwyiingudsähgøøbiä. Nidiúh-mhøch tøø nmähmø'øy jujcy. Høøčhpaady hajxy xjia wi'i yagho'ogaambä”, nømä Elías ja'a Dios jecy ñämaayy. ⁴ Mänitä Dios yhadsooyy: “Caj tiøyyä cooč miičh nidiuhṃ xjiaac wiingudsähgø'øyñä. Jé'enöchä jäya'ayhajxy xwyiingudsähgø'øyñä ja'a hajxy näjuxtujmilpä. Cabä Baal hajxy wyiingudsähgø'øy. Quepychech je'e ja'a Baalha-jpä”, nømä Dios jecy miänaañ. ⁵ Ja'a judíosahajxy, jequiän hajxy jaduhṃ yajnähdiijä ja'a Diósäm coo hajxy hänajty quiu'ughada'añii. Paady hajxy jaduhṃ quiu'ughadyii coo Dios hojioot jiaanč tehṃ miøødä. Pero näweeñtiä

judíos ja'a Dios miädia'agy hajxy miäbøjcä, caj ñämayyä. Jäda'anäbaadyñä, jiinä judíos ja'a Dios miädia'agy hajxy näje'e miäbøjcä. Je'enä hajxy quiu'ughadyiinä ja'a Diósäm. Coö hajxy jaduññä ñäxuučhii, paady hajxy je'enä wioowhidyyi, jaduññä Dios miädia'agy tehngajnä miäbøjcäxät. ⁶ Jaduññä judíoshajxy yajnähdijjä coö ja'a Dios miädia'agy hajxy miäbøjcät ja'a Jesucristocøxpä. Paady hajxy jaduññä yajnähdijjä je'eguiøxpä coö Dios hojioot miøødä, ca'a jie'eguiøxpä coö hajxy hoy jiäya'ayhaty. Coö jäya'ayhajxy häxøpy ñäxuučhii ja'a Diósäm je'eguiøxpä coö tyijy hajxy hoy jiäya'ayhaty, cab hajxy jaduññä cu nmänáanäm coö Dios hojioot miøødä.

⁷ Hiç, näje'e judíoshajxy yajnähdijjä coö hajxy ñähwá'adsät näweeñtiä. Jaduññä Dios miädia'agy hajxy miäbøjcä ja'a Jesucristocøxpä. Ja'a judíoshajxy nämaybä, cab hajxy jaduññä yajnähdijjä, hoy hajxy hänajty jaduññä jia wi'i ñähwa'adsa'añ. Hiç, xejx ja'a quiopcä tiaatsc-hajxy jaduññä. Cabä Dios miädia'agy hajxy miäbøjcä ja'a Jesucristocøxpä. ⁸ Jaduññä jim myiñ cujaay maa Diosmädia'aguiän: “Tøø quiopcä tiaatsc-hajxy yaxéjxäxä ja'a Diósäm. Jaduññä hajxy yhity nebiä wiindspän nebiä cuhnatpän høxtä jäda'anäbaadyñä.” ⁹ Jaduññä David jecy quiujahbiä:

Xøødsuu ja'a judíoshajxy naçy yagjätäp. Jadúhñäc tyijy ja'a Diosmädia'agy hajxy hoy quiudiuñ. Jadúhñäc tyijy hajxy quiumayii ja'a Diósäm. Pero ween hajxy hoy quiumädoç. Hiç, cab hajxy tøyhajt miäbøga'añ.

¹⁰ Ween hajxy jaduññä jiaty nebiä wiindspän nebiä xoodspän.

Ween hajxy ni mänaa quia'a wiinjuø'øç nebiä piojpä quiädieeyhajxy ñähwá'adsät.

Jaduññä David jecy quiujahy.

¹¹ Hoorä, nämayyä judíoshajxy tøø quia'a mäbøcy ja'a Jesucristocøxpä. Pero cab hajxy nägøxiä ñajtshixø'owa'añii ja'a Diósäm. Cab hajxy nägøxiä quiumä-dowa'añ. Pero jaduñä Dios wyiinmaayy coo jäya'ayhajxy ween miäbøcy ja'a Jesucristocøxpä, ja'a hajxy ca'a judíospä. Coö ja'a ca'a judíoshajxy ñähwaatsnä, paadiä judíoshajxy näje'e jia mänaambä coö hajxy ween ñähwáatspät. ¹² Coö judíoshajxy quia'a mäbøcy ja'a Jesucristocøxpä, paady hajxy paquiä ñajtshixøøyyä ja'a Diósäm. Pero mänitä Dios wyiinmaayy coö jäya'ayhajxy ween ñähwa'açh wiinduhmyhagajpt, ja'a hajxy cajpä judíos. Paadiä judíos ja'a quiopcä tiaatsc-hajxy yaxéjxäxä ja'a Diósäm. Paadiä hoyhajtä weenhajt hajxy quia'a mooyyä ja'a Diósäm. Cu miooyyä hajxy jaduñ coö hajxy cu miäbøcy ja'a Jesucristocøxpä. Pero ja'a jäya'ayhajxy ca'a judíospä, ja'a hajxy jim tsánaabiä wiinduhmyhagajpt, je'edsä hoyhajtä weenhajt mäbøcypiä mooyyä. Hoorä, habaadaamb jaduñ coö judíoshajxy miäbøgaambä ja'a Jesucristocøxpä. Mänit hajxy je'e ñähwa'adsaambä. Jaançh tehñ jootcujc hajxy jaduñ yhidáannäbä. Mänitä jäya'ayä hoyhajtä weenhajt hajxy maas may jiaac mo'owa'añii wiinduhmyhagajpt.

¹³ Mijts jaduñ ca'a judíoshajpä, mijts nyajwiinmädi-aagøøñäp. Dióshøch jaduñ tøø xwyiinguexy coöchä miädia'agy jim nyajwá'xät maa mijtsän. Xtiungmóoyy-høchä Dios jaduñ. Nägø'ø nädécypiøchä nduung jaduñ nnä'ägä tuñ, ¹⁴ ween mijts nämay mmäbøcy ja'a Jesucristocøxpä, ween mijtsä judíos jaduñ xpiahixy. Coö mijtsä judíos jaduñ xyhíxät coö mijtsä Dios ja'a hoyhajtä weenhajt tøø xmio'oy, mänitä judíoshajxy miäbøgaambä ja'a Jesucristocøxpä. Høøch nmägunaaxhajxy je'e ja'a judíoshajxy. Ween hajxy jaduñ ñähwáatspät neby mijts tøø mnähwa'açhän. ¹⁵ Coö judíoshajxy

quia'a mǎbøjcy ja'a Jesucristocøxpä, paady hajxy ñajtshixøøyyä ja'a Diósäm. Paadiä Dios hǎnjaty tøø wyiimay coo mijtsä miädia'agy mmǎbøjcnät, pønjaty jaduħn ca'a judíospä. Y coo judíoshajxy jaduħn miǎbøjpat ja'a Jesucristocøxpä, mǎnit hajxy quiuhbøgáanägumbä ja'a Diósäm. Mǎnit hajxy yagjugyhada'añii homiánaajä ja'a Diósäm neby jaaya'ay jiugyhatiän. ¹⁶ Ja'a judíoshajxy, ja'a Abraham hajxy jecy yhaphajt tieedyhajt. Yhaadshajt tyictshajt ja'a Abraham hajxy jaduħn. Jéquiänä Dios ja'a Abraham quiu'ughajty. Paadiä judíoshajxy jäda'ahaty quiu'ughájtäbä ja'a Diósäm. Jaduħn mäwiinä Abraham miäbaady nebiä quepytyictsän. Y ja'a judíoshajxy, jaduħn mäwiin hajxy miäbaatpä nebiä quepyhaa'xän.

¹⁷ Hoorä, nämayyä judíoshajxy tøø quia'a mǎböcy ja'a Jesucristocøxpä. Paady hajxy tøø ñajtshixø'øyii ja'a Diósäm. Jaduħn mäwiin hajxy miäbaady nebiä olivohaa'x tøø piuhdøjjiän. Jaduħn miädia'agytiägø'øcy coo judíos ja'a hoyhajtä weenhajt hajxy quia'a mo'owáanänä ja'a Diósäm. Y mijts ca'a judíospä, jaduħn mäwiin hajxy mmäbaatpä nebiä yuuc-holivohaa'xän coo tøø yagjøjheedsø'øcy maa olivohaa'x tøø piuhdøjjiän. Coö hajxy tøø mmǎbøjnä, paadiä Dios hajxy xmiooñä ja'a hoyhajtä weenhajt. ¹⁸ Pero caj mijtsä judíos hawiinmats mbéxät. Ca'a hajxy mniguiumayii. Cab hajxy mmáná'anät: "Cabä judíoshajxy quiu'ughájtänä ja'a Diósäm. Højtsä Dios xquiu'ughájtänäp, højts ca'a judíospä." Hiḡ, Dios mijts jaduħn tøø xquiunuu'xy je'eguiøxpä coo Abraham jecy quiunuu'xä møødä yhap møødä yhoc, ja'a judíoshajxy. Coö Dios ja'a Abraham jecy cu quia'a cunuu'xy, ni mijts hijty xquia'a cunuu'xaambä.

¹⁹ Wehñdä pøn miäná'anät: "Yø'ø judíoshajxy tøø quia'a mǎbøquiäbä ja'a Jesucristocøxpä, høøchcøxpä hajxy tøø ñajtshixø'øyii ja'a Diósäm. Hiḡ, páadyhøchä

Dios xchocy cooĉh nga'a judíosä. Cabä judíoshajxy chójcänä ja'a Diósäm.”²⁰ Tøyhajt jaduhñ. Paadiä judíoshajxy tøø ñajtshixø'øyii ja'a Diósäm coo hajxy tøø quia'a mábøcy ja'a Jesucristocøxpä. Y mijts, coo hajxy tøø mmábøcy, paady mijtsä Dios tøø xquiunuu'xy. Pero ca'a hajxy mniguiumayii coo Dios hajxy jaduhñ xñä'ä najtshixøobiät. Hiç, caj mijts hijty hoy mjäya'ayhaty. Coo Dios hojioot miøødä, paady hajxy xquiunuu'xy.²¹ Jaanĉh tehñ yajcumayaambä judíoshajxy jaduhñ. Paady hajxy jaduhñ ñiguiumayii coo hajxy tøø quia'a mábøcy coo hajxy tsipcøxp ñäxuudsøøjät ja'a Diósäm. Paady hajxy ñajtshixøyyä ja'a Diósäm, hoyyä Abraham hajxy jecy jia haphajty jia teedyhajty. Jaanä jaduhñ mijtspä, mijts ca'a judíospä, coo mijts jaduhñ mniguiumáayyäbät, mänitä Dios hajxy jaduhñ xñajtshixøobiät.²² Hiç, jiaanĉh tehñ quiunuu'xypä Dios ja'a quiu'ug. Pero pønjetiä Dios tøø ñajtshixø'øy, je'eds hajxy jaduhñ jaanĉh tehñ yajcumädowaanäp ja'a Diósäm. Paady mijtsä Dios xjiaanĉh tehñ quiunuu'xy, coo hajxy mmábøcy. Pero pø cab hajxy jaduhñ mmábøgaannä, mänitä Dios hajxy xyajcumädowaambä.²³ Hoorä, ja'a judíoshajxy tøø quia'a mábøquiäbä, coo hajxy jaduhñ miäbøjpät, mänit hajxy jadähooc quiu'ughájtägumbät ja'a Diósäm. Haa ca'a, miøødä Dios mäjaa jaduhñ coo hajxy jaduhñ quiu'ughájtägumbät.²⁴ Hiç, ja'a judíoshajxy, Abraham hajxy jecy yhaphajt tieedyhajt. Jéquiänä Abrahamhajxy yajnähdiijä ja'a Diósäm coog hajxy jaduhñ quiu'ughadøøjät ja'a Diósäm, møødä Abraham yhap yhoc-hajxy, ja'a judíoshajxy. Tøyhajt jaduhñ, paadiä Abrahamhajxy paquiä hoy quiu'ughadäänägumbä Diósäm. Y mijts, jaanä jaduhñ mijtsä Dios xquiu'ughájnäbä, hoy mijts hijty jegyhajty xquia'a cu'ughaty. Paady, ca'a hajxy mmäna'añ cooc tyijy

ja'a judíoshajxy quia'a cu'ughajtägatsa'añii ja'a Diósäm.

²⁵⁻²⁶ Mägu'ughajpädøjc, nébiøch cham̄ nmädia'a-ga'añän, náam̄nøchä Dios tøø xñajtsapxøyyä. Cahnä jäya'ay hädaa mädia'agy hajxy nämay miädoyñä. Paady mijts jaduhñ nhawáanäm, jaduhñ hajxy mga'a niguiumayóøjät, hoyyä Dios hajxy tøø xjia cu'ughaty. Tøyhajt jaduhñ coo judíoshajxy nämay tøø quia'a mábøcy ja'a Jesucristocøxpä. Pero habaadaamb jaduhñ coo hajxy nägøxiä miäbøgaannä. Mänit hajxy jaduhñ miäbøga'añ coo mijts hánajty tøø mmábøcy, ja'a mijts ca'a judíospä, mäduhñtiä hajxy hánajty mmábøga'añ. Jaduhñ jim̄ myiñ maa Diosmädia'aguiän:

Mänitä yajnähwaatspä jim̄ choona'añ maa cajpt jaduhñ xiøhatiän Sión, maa judíoshajxy chána'ayän.

Cøxaambä judíoshajxy jaduhñ miäbøga'añ ja'a yajnähwaatspäcøxpä. Cøxaambä piojpä quiädieeybä hajxy ñähwa'adsa'añ.

²⁷ Cooch hajxy jaduhñ nyajnähwá'adsät, mänit jaduhñ tiøjiada'añ nébiøch hajxy hijty tøø nyajwiinwaanø'øyän mänáajøch hajxy nmøodyajcuhduquiän hawiinjemy, nømä Dios miänaañ.

²⁸ Coo judíoshajxy tøø quia'a mábøcy ja'a Jesucristocøxpä, paady hajxy tøø ñajtshixø'øyii ja'a Diósäm. Y coo hajxy jaduhñ tøø ñajtshixø'øyii, paady mijtsä Dios tøø xyajnähdiij coo hajxy mmábøgät ja'a Jesucristocøxpä, mijts ca'a judíospä. Pero, hoyyä judíoshajxy tøø quia'a jagä mábøcy, tsójcäpnä hajxy jaduhñ ja'a Diósäm je'eguiøxpä coo yhapä tieedyhajxy jecy yajnähdiijjäxä ja'a Diósäm coo hajxy quiu'ughadóøjät. ²⁹ Hiç, cabä Dios mänaa yhøhñda'agy. Homiänaajä yajtøjiaty waambaty quiapxy miädia'agy. Y coo Dios jaduhñ jecy miänaañ coogä judíoshajxy

homiänaajä quiu'ughada'añii, yejcä Dios ja'a tøyhajt jaduñ. Hiç, cabä Dios ja'a miädia'agy mänaa yajtägach. Jaduhñä tøyhajt hajxy nmøødhájtäm coo Dios jiaançh yajtøjiada'añ waambaty tøø miäna'añ ja'a judíosçøxpähajxy. ³⁰ Mijts ja'a ca'a judíospä, cabä Diosmädia'agy hajxy hijty mmädooyä. Cabä Dios hajxy hijty mwiingudsähgø'øy. Y coo judíoshajxy tøø quia'a mæbøcy ja'a Jesucristocøxpä, paadiä Dios hojioot miøødä ja'a mijtsçøxpä. ³¹ Jäda'anäbaadyñä, cabä judíos ja'a Dios miädia'agy jäda'ahaty miäbøgaanä ja'a Jesucristocøxpä. Coø hajxy jaduñ quia'a mæbøga'añ, paady mijtsä Dios xñäxuu'tsnä, mijts ca'a judíospä. Hoorä, coø mijtsä judíos xyhíxät coø mijtsä Dios xñäxuuçh, mänit hajxy jaduñ miäbøgaambä ja'a Jesucristocøxpä. Mänit hajxy ñäxuudsáanäbä ja'a Diósäm. ³² Jéquiänä Dios jäya'ay yhawaanä nägøxiä coø pojpä cädieey hajxy miøødä, møødä judíoshajxy, møødä ca'a judíoshajxypä. Jaduhñ hajxy jecy yhawáanäxä coø hajxy hawiinmats quiumädówät. Hiç, paadiä Dios jaduñ miänaañ, je'eguiøxpä coø jäya'ayhajxy hånajty nägøxiä ñäxuudsä'añii tu'cuñdujt, møødä judíoshajxy, møødä ca'a judíoshajxypä. Coø Dios hajxy häxøpy tøø xquia'a näxúu'tsäm, nägøxiä hajxy hijty ngumädowáanäm.

³³ Jaançh tehñ jiajp, jaançh tehñ ñajuøøbiä Dios. Cab hajxy hoy nnä'ägä wiinjuø'øwáanäm nebiatiä Dios wyiinmay. Hiç, hojiootä Dios jiaançh tehñ miøød coø hajxy nägøxiä tøø xñäxúu'tsäm, møødä judíoshajxy, møød cäjpä judíoshajxy. Nägøxiä ja'a hoyhajtä weenhajt hajxy xmio'owáanäm tu'cuñdujt. ³⁴ Jaduhñ jim myiñ cujaay maa Diosmädia'aguiän: "Cabä Dios ja'a wyiinmahñdy pøn ñajuøøyyäxä. Cabä Dios pøn miäyajtøy nebiä wyiinmahñdyhädät. ³⁵ Cabä Dios pøn miänuu'xyhaty." ³⁶ Hamdsoojootä Dios ja'a naaxwiimbä jecy yhädi-

uuñ mөөдä jäya'ay nägөxiä. Tijaty yaa jájtäp túunäp hädaa yaabä naaxwiin, ja'a Dios jaduһn haneһmb coo jaduһn jiadóojät, coo jaduһn tiunóojät. Y tijaty jaduһn jadaanäpnä tunáanäpnä, ja'a Dios jaduһn yajtөjiadaamb nebiaty hánajty tөө wyiinmay. Tsөгä Dios hajxy möj jaanч pädáacäm homiánaajä. Tsөг hajxy homiánaajä wiingudsähgöөyyäm. Amén.

12

¹ Mägu'ughajpädөjc, miөөдä Dios hojioot maa höjtsөxphájtäm. Chamч mijts nhane'emy coo hajxy hamuumdu'joot mniyegóojät Dios quiө'өjooty tiecyjiooty. Jaduһnä Diosmädia'agy hajxy hoy mgudiúnät hamuumdu'joot. Jaduһnä Dios hajxy hoy mwiingudsähgө'өwät nebiä Dios hajxy xyajmädsөquiän. ² Ca'a hädaa wiinmahñdy hajxy myajtuñ nebiä jäya'ay wyiinmahñdyhajxy yaajän. Pөnjatiä Dios quia'a cu'ughajpy, je'eds hädaa yaabä wiinmahñdy hajxy yajtuumb. Cabä yhaxөгwiiinmahñdy hajxy ñajtshixө'өwa'añ. Ca'a hajxy mbahixy. Hawiinjemybiä wiinmahñdy hajxy jaduһn mmөөdhájnäp, je'eguiөxpä coo Jesucristo hajxy mmөөdhijnä tu'ugjoot tu'ugwiinmahñdy. Jaduһnä tөyhajt hajxy mmөөdhádät tijatiä Dios hajxy xyajmädsөjp coo hajxy mdúnät. Homiánaajä Dios hajxy xyajmädsөjcäm coo hajxy hoy njäya'ayhájtämät, coo hajxy hoy ndúunämät. Coo hawiinjemybiä wiinmahñdy hajxy jaduһn nmөөdhájtämät, jaduһnä tөyhajt hajxy jaduһn nmөөdhájtämät tijatiä Dios hajxy xyajmädsөjcäm coo hajxy ndúunämät.

³ Mayhajtä Dios jaduһn ñä'a tuun ja'a hөөчcөxpä coöchä cuһdujt jaduһn xmiooyy coöch mijts nmägäpх nhané'emät. Ca'a hajxy mniguiumayii cooc tyijy hajxy

cøxiä wiinä mjaančh tehñ jiaty. Tijatiä tuungä Dios hajxy tøø xmió'oy, je'eds hajxy mmøjpädá'agäp. Ca'a wiingtuung hajxy mmøjpäda'agy. Hoy hajxy mdúnät nebiatiä Dios hajxy tøø xyajnáhdijy. ⁴ Hix, nägøxiä ni'xcopc hajxy nmøødhájtäm møødä cø'ødecy, møødä wiinjøjp, møødä copctaatsc. Cab hajxy tiu'ugtuungä; haagä hawiingjaty hajxy tiuñ. Pero haagä tuungpaatp hajxy jaduhñ. ⁵ Jaduhñ mäwiin højts nmäbáatäm nebiä tu'ugni'x tu'ugcopcän coo hajxy tu'cuhdujt nmäbójcäm ja'a Jesucristocøxpä, hoy hajxy nja nämayhájtäm. Jaduhñ hajxy hawiingjaty ndúuñäm. Jaduhñ hajxy nnibiuhbéjtäm hamiñ haxøpy.

⁶ Tsøg hädaa tuung hajxy hoy yajnócxäm nebiatiä Dios hajxy tøø xyhanéhmäm. Mayhajtä Dios jaduhñ tiuun coo wiinmahñdy hajxy cøjwiinduum xmióoyyäm nebiaty hajxy ndúuñämät. Pønjaty tøø tiuungmo'oyii coo Dios ja'a miädia'agy hajxy yajwá'xät nebiaty hajxy hánajty tøø ñajtsapxóøyyäxä, ween hajxy jaduhñ yajwa'xy nebiaty hajxy hánajty piuhbedyii. ⁷ Pønjaty tøø tiuungmo'oyii coo hajxy miäbuhbédat, ween hajxy hamuumdu'joot tiuñ. Pønjaty tøø tiuungmo'oyii coo Diosmädia'agy hajxy yajwá'xät, ween hajxy hoy yajwa'xy. ⁸ Pønjaty tøø tiuungmo'oyii coo hajxy miäjootcapxmøcpógät, ween hajxy hoy tiuñ. Pønjaty mäyøø, weenä häyoobä hajxy piuhbety hamuumdu'joot. Pønjaty tøø tiuungmo'oyii coo hajxy miähané'emät maa tsajtøjcän, ween hajxy hoy miähane'emy. Hix, Dios ja'a cuhdujt jaduhñ yejc coo hajxy jaduhñ miähané'emät. Pønjaty tøø tiuungmo'oyii coo mayhajt hajxy tiúnät maa häyoobädøjcän, møød maa yaamgto'oxyhajxiän, ween hajxy hamuumdu'joot piuhbety. Møød weenä pa'amjäya'ay hajxy quiuhixy.

⁹ Tsøg hajxy hamuumdu'joot ničhójcäm nibia'häyóowäm. Tsøgä haxøøgpä hajxy najtshixóøyyäm.

Tehngajnä howyiinmahñdy hajxy tsøc tsójcäm. ¹⁰ Hamiñ haxøpy hajxy mniçhogøøjät mnibia'häyowøøjät neby tu'ugpuhya'ay neby tu'ugpuhdo'oxypän. Hamiñ haxøpy hajxy mniwyiingudsähgø'øwøøjät. Cab hajxy mnibiexøøjät.

¹¹ Hamuumdu'jootä Wiindsøn Jesucristo hajxy mmädúnät. Jootcujc hajxy jaduñ mdúnät. Cab hajxy jaduñ mänaa mnänuuxø'øwät.

¹² Coø hajxy pøn xchaaçhtiúnät, cab hajxy mmøjpäda'agät; mmee'xtúgäp hajxy jaduñ. Mnajuøøby hajxy jaduñ coø hajxy jim mnøcxa'añ maa Dioswiinduumän. Paady hajxy jaduñ mxoondá'agät. Homiänaajä Dios hajxy mba'yá'axät.

¹³ Coø pøn tii yajmaajiádät, naxy hajxy mdehm piuhbédät. Je'eçh jaduñ nnänøømby pøn jaduñ mäbøjp ja'a Jesucristocøxpä. Pønjaty jaduñ mejtsp maa mdøjc-hajxiän, myajtøjtägø'øwäp hajxy je'e. Myajcáyäp myaghú'ugäp hajxy jaduñ.

¹⁴ Coø hajxy pøn xchaaçhtiúnät, cab hajxy mmähanhádät. Pero mmänuu'xtá'agäp ja'a Dios hajxy coø hajxy ween ñähwa'açh.

¹⁵ Pønjaty xoonaacp, mmøødxoondá'agäp hajxy je'e. Pønjaty jøøby xuu'tsp, mmøødjø'øw mmøødxúudsäp hajxy je'ebä.

¹⁶ Tu'ugcøpc tu'ugwiinmahñdy hajxy mnimiøød-hidøøjät. Cab hajxy pøn mbéxät. Jootcujc hajxy mhídät, hoyyä møjtuung hajxy mga'a jagä møødä. Cab hajxy mänaa mniguiumayøøjät.

¹⁷ Coø häna'c hajxy xyhäyoowhíxät, cab hajxy myaghawiimbijtagátsät. Hoy hajxy mjäya'ayhádät, jaduñä Dios hajxy jaduñ xquiumáyät; jaduñ mijtsä cu'ug waamb xquia'a nänómät. Pero xwyiingudsähgø'øwäbä cu'ug hajxy jaduñ. ¹⁸ Coø mijtsä

cu'ug xjia wi'i jiojcapxó'owät coo hajxy jaduhñ mbahíxät nebiaty hajxy haxøøg jiatcø'oyän, cab hajxy jaduhñ mbahíxät. Pero coo hajxy waamb xquia'a nämá'awät, mänit hajxy hoy yajxón mmøødmädiá'agät. Cab hajxy pøn mmädsiphádät. ¹⁹ Mägu'ughajpädøjc, coo hajxy pøn xyhäyoowhíxät, cab hajxy myaghawiimbijtagátsät. Dios jaduhñ yaghawiimbídäp. Jaduhñ jim myiñ cujaay maa Diosmädia'aguiän coogä Dios jaduhñ miänaañ: "Høøch jaduhñ nyaghawiimbídäp." ²⁰ Coo hajxy pøn xmiädsiphádät, cab hajxy mmädsiphajtagátsät. Jaduhñä Diosmädia'agy miäna'añ: "Pø yähó'cäbä häna'c ja'a miiçh hänäjty jaduhñ xmiädsiphajpä, myajcáyäp myaghú'ugäp jaduhñ. Pø tødsøyyäp, mmó'owäbä nøø. Coo jaduhñ mgudiúnät, hoyhoyä häna'c chähdiúnät, ja'a miiçh hänäjty jaduhñ xmiädsiphajpä." ²¹ Nägüeeñtä hajxy mhídät, cabä haxøøgpä hajxy myaghawiimbijtagátsät. Coo hajxy jaduhñ mjatcø'owät, myajcähxó'øgäp hajxy jaduhñ coo mhaxøøgwiinmahñdy hajxy hänäjty tøø mbadu'ubøjcumbä. Pero coo häna'c hoy yajxón mmägápxät, ja'a mijts hänäjty xmiädsiphajpä, jaduhñ hajxy myajcähxó'øgät coo hawiinjemybiä wiinmahñdy hajxy hänäjty mmøødhajnä. Mänitä Dios jaduhñ xquiumáyät.

13

¹ Tsøg hajxy nägøxiä cudiúnäm nebiatiä cuduung hajxy xyhanéhäm. Hix, Dios ja'a cuhdajt møc møød. Je'e ja'a cuhdajt yejp jadähooc. Pønä cuhdajt møød, paady jaduhñ miøødä coo tøø mio'oyii ja'a Diósäm. ² Pøn jaduhñ ca'a cudiunaamb nebiatiä cuduung jia hane'emiän, quiumädownaamby hajxy je'e. Hix, ja'a Dios ja'a cuduung pädaac coo yhané'emät. Jaduhñds

je'e, pø cab hajxy jaduhñ mgudiuna'añ nebiatiä cuduung yhane'emiän, jaduhñ miäbaady coo Dios miädia'agy hajxy mga'a cudiunaanä. ³ Pønjaty hoy wädijp, cabä cuduung hajxy chähgø'øy. Pero pønjaty hoy ca'a wädijp, je'eds mæbøcypiä tsähgøøby. Coo hajxy hoy mwädítät, mäniä cuduung hajxy xquiumáyät. Cab hajxy jaduhñ xchaaçhtiúnät. ⁴ Hiç, ja'a cuduunghajxy, moonsähjtäp hajxy je'e ja'a Diósäm. Paady hajxy jaduhñ tiuñ, coo mijts hajxy jaduhñ xwioowhídät. Jaduhñä cuhdujt hajxy tøø mióoyyábä coo mijts hajxy xyajcumädówät coo mijts hänajty tøø mgädieey. Paady hajxy jaduhñ md-sähgø'ówät. ⁵ Naxy hajxy mdehm quiudiúnät nebiatiä cuduung hajxy xyhane'emiän, coo Dios hajxy jaduhñ xñä'a yajcumädówät. Jaanä jaduhñduhmbä, coo hajxy hamdsoo mnajuø'øy coo jaduhñ yhahixø'øy coo hajxy hoy mwädítät, paady hajxy jaduhñ mgudiúnät waambatiä cuduung hajxy xyhane'emiän. Coo hajxy jaduhñ mga'a cudiúnät, cab hajxy jootcujc mhídät, je'eguiøxpä coo hajxy hänajty mnajuø'øy hamdsoo coo hajxy hänajty tøø mgädieey. ⁶ Jaanä jaduhñduhmbä, tsipcøxp hajxy mnähjuudiú'udät tijaty häna'c hajxy xyajnämaaby coo hajxy mnähjuudiú'udät. Hiç, ja'a Dios ja'a cuhdujt jaduhñ yejc coo mijtsä häna'c jaduhñ xyagjúyät.

⁷ Hahixøøby jaduhñ coo cuduung hajxy mmäjúyät nebiaty hajxy xyajnäma'ay. Jaanä jaduhñ yhahixøøbiä coo cuduung hajxy mwiingudsähgø'ówät, miøjjä miuutscä.

⁸ Naxiä mnuu'xy hajxy mdehm jiahmiédsät. Naxy hajxy mniçhogøøjät nebiä tu'ugpuhya'aybän, nebiä tu'ugpuhdo'oxypän. Hiç, pøn wiinghäna'c tsojp, hoy jaduhñ quiudiuñ nebiatiä Dios hajxy xyhanéhäm. ⁹ Jaduhñä Diosmädia'agy miäna'añ: "Pø jim miiçh mdo'oxiøjc, cabä wiingpä mmøødhídät. Cab mmäyaghó'ogät. Cab mméedsät. Cabä mmädøjcä

jie'e mhadsójcät.” Hoorä, coo wiinghäna'c mdsógät hamuumdu'joot, hoy jaduñ mguđiúnät nebiøch naamnä tøø nmädia'aguiän. ¹⁰ Hiç, pøn wiinghäna'c jaanç tsojp hamuumdu'joot, cab jaduñ mänaa yhäyoowhixa'añ. Hoorä, coo wiinghäna'c mjaanç tsógät hamuumdu'joot, hoy ca'xy mguđiúnät nebiä Dios yhane'emiän.

¹¹ Naxy hajxy jaduñ mdehm ñiçhogójtät. Hiç, mna-juøby hajxy jaduñ coo tøø jiecý mänaa hajxy tøø mmäbøquiän. Habáatnäp jaduñ coo Jesucristo hajxy min xyajpäð'øgáanäm, coo hajxy jim xyajnøcxáanäm tsajpootyp. Nägüeenä hajxy jaduñ mwäđítät. Hiç, cab hajxy nnajuóyyäm mänaa Jesucristo yaa quiädaactägatsa'añ, coo hajxy jaduñ xñä'ä nähgädaacpéjtämät. Hiç, coo jaduñ quiädaactägátsät, mänit hajxy xya-jtøyhajtyegáanäm. ¹² Habáatnäp jaduñ coo hajxy yaa ndsoonáanäm, coo hajxy jim nnøcxáanäm tsajpootyp. Tsøcxä ja'a haxøgpä hajxy najtshixóyyäm neby hajxy yaa tøø njäya'ayhájtäm, cahnä Dios hajxy hánajty nwi-ingudsähgóyyäm. ¹³ Tøø Dios hajxy xyajnähđijjäm coo hajxy homiänaajä njugyhájtämät neby je'e jiugyhatiän. Paadiä Diosmädia'agy hajxy hoy nbanøcxáanäm. Tsøcxä hajxy hoy wäđjtäm, ca'a jiaduñä nebiä häna'c-hajxy hagoonstuum wäđjpän. Cab hajxy mhaxøghu'ug mhaxøgjóø'xät. Cab hajxy comjaty mhú'ugät. Cab hajxy jim mnøcxät maa cuhhiñdo'oxiøjc-hajxiän. Tsøgä to'oxiøjc hajxy wiingudsähgóyyäm. Hiç, ja'a cu'ug hajxy xyhíxäm neby hajxy njäya'ayhájtäm, pø hoy, pø caj. Cab hajxy haxøg mnä'ägä jatcó'øwät. Cab hajxy pøn mmahanhádat, hoy hajxy jia mäyøøjä que mijts. Cab hajxy tii mmädsibó'øwät. ¹⁴ Ja'a Jesucristo hajxy nWiindsøn hájtäm. Je'e hajxy xyhanéhäm. Jaanç tehñ yhoy je'e wyiinmahñdyhaty. Naxy hajxy jaduñ mdehm miøðhídät tu'ugjoot tu'ugwiinmahñdy.

Jaduhñä mhaxøøgwiinmahñdy hajxy hoy mhøxhíxät. Jaduhñ hajxy hoy mhäna'c-hádät.

14

¹Jii jäya'ayhajxy näje'e, cahnä Diosmädia'agy hajxy hoy yhabøcyñä, hoy hajxy tøø jia mäbøcy ja'a Jesucristocøxpä. Hahixøøby jaduhñ coo hajxy mmägu'ughádät. Pero cab jaduhñ yhahixøøby coo mädia'agy hajxy mmøødyajyónät ja'a cuhdujtcøxpä. ²Pønjatiä Diosmädia'agy hoy tøø yhabøcy, ñajuøøby hajxy je'eduhñ coo jaduhñ yhawiiinmatsä coo hotyijä mgáyät. Pero pønjaty hoy tøø quia'a habøcy, cábc tyijy yhooyä coo tsu'učh ndsú'tsämät. Páadiác tyijy quia'a hoyyä coo tsu'učh ndsú'tsämät, yaj-najuøøby jaduhñ coo häna'c ja'a tsu'učh hajxy hänäjty tøø quiunuu'xy maa habojsnaxxy wyiinduumän. Jaduhñäc tyijy miäbaady néjjiämä habojsnaxxy jaduhñ mwiingudsähgøøbiän. ³Hoorä, pø mdsu'chp miichä tsu'učh, cab jaduhñ mbéxät ja'a häna'cä tsu'učh ca'a tsu'tspä. Jaaná jaduhñduhm̄bä, pønä tsu'učh ca'a tsu'tsp, cab jaduhñ waamb ñämá'awät ja'a häna'cä tsu'učh tsu'tspä cooc tyijy jaduhñ quiädieey. Haa ca'a, ja'a Dios yhuung je'ebä. ⁴Cabä cuhdujt jaduhñ myiñ coo waamb mnämá'awät pønä Diosmädia'agy panøcxp. Haa ca'a, ja'a Dios ja'a mioonsä je'ebä. Jagooyyä Dios cuhdujt jaduhñ miøødä coo miäná'anät pø hoyyä mioonsä quiudiuñ, pø caj. Hamdsoojä Dios jaduhñ ñämá'awät neby hoy wiädítät. Haa ca'a, ja'a Dios je'e hanehm̄b.

⁵Näje'ejä jäya'ayhajxy miäna'añ coo poo'xxiøø jyijjä mädyii hajxy yhamajtsc-hádäp. Näje'e hajxy miänaambä coo Dios hajxy homiänaajä nwiingudsähgøøyyämät. Pero mijts, jaduhñ hajxy mgudiúnät nebiä Dios hajxy hamdsoo tøø xyajwiinjuø'oyän. ⁶Hix, pønjaty jaduhñ mänaamb coogä poo'xxiøø jyijjä, nägüeentä hajxy jaduhñ

wiädity ja'a poo'xxiøjooty. Jahuñä Dios hajxy wyi-
ingudsähgø'øy. Jaanä jahuñduhmbä, pønjaty jahuñ
mänaamb cooc jahuñ quia'a cädieeyä coo tsu'učh nd-
sú'tsämät, hoy hänajty tøø jia cunuuxyii maa haboijt-
snaxy wyiinduumän, mioobiä Dios Dioscujú'uyäp jahuñ
coo jahuñ yajcayii. Jaanä jahuñduhmbä, pøn jahuñ
mänaamb cooc jahuñ quia'a hoyyä coo tsu'učh ndsú't-
sämät, jaanä jahuñä Dios Dioscujú'uyäp mioobiä coo
jahuñ yajcayii.

⁷ Coo Diosmädia'agy hajxy nmäbøjcäm ja'a
Jesucristocøxpä, paady hajxy xmioonsähjätäm. Paady
jahuñ quia'a hahixø'øy coo hajxy njäya'ayhjätmät
nebiä nhamdsoojoot hajxy chójcäm. Ni ja'a cuhdujt hajxy
nga'a møødhjätmät coo hajxy hamdsoo nniyajnähdijämät
mänaa hajxy nho'ogáanäm ndägoyyáanäm. ⁸ Ja'a
Jesucristo hajxy xmioonsähjätäm mäduhñtiä hajxy yaa
njugyhjätmät, hoy ñejpiä hajxy cu nja jajt cu nja habéjtmät.
Y coo hajxy nho'c coo hajxy ndägóoyyämät, je'enä
hajxy hänajty xmioonsähadáanäm homiánaaja. ⁹ Coo
ja'a Jesucristo hajxy xñähho'túutäm, mänit jadähooc
jiujypiøjtägajch. Jahuñ hajxy xquiu'ughjätmät, pønjaty
jahuñ mäbøjp, møød hajxy tøø yhó'oguiäbä, møød
hajxy jaac jujcypiä jaac tsuxpä. Jaanä jahuñ hajxy
xyhanéhmbä.

¹⁰ Cabä mmägu'ughajpä hajxy hawiinmats mbéxät,
hoyyä Diosmädia'agy hajxy hoy quia'a jagä habøcyñä.
Cab hajxy pøn mnämä'awät cooc tyijy hajxy hoy quia'a
cudiuñ, hoyyä wiingcuhdujt hajxy jia panøcxy. Hiç, coo
Jesucristo yaa quiädaactägätsät, mänit hajxy nägøxiä jim
nnaxø'owáanäm ja'a Jesucristo wyiinduum tøyhajtyejpä.

¹¹ Jahuñ jim myiñ maa Diosmädia'aguiän:

Nägøxiöchä jäya'ayhajxy nøcxy xwyiinjinna'awa'añ.

Xwyyiingudsähgø'øwáambøch hajxy jaduhñ. Jadúhñhøch
hajxy xquiapxpaadaambä cooçh nidiuhñ
nDioshaty. Tøyhajt jaduhñ,
nømä Dios miänaañ. ¹² Jaduhñ hajxy nyajnujuóyyäm
coo hajxy nägøxiä jim nøcxy ndøyhajtyegáanam Dioswi-
induum.

¹³ Cab hajxy tsøc niñänøømänä cooc tyjy ja'a Dios-
mädia'agy hajxy hoy nga'a panócxäm. Pero jaduhñ
tsøc cudiúunäm nebiatiä mæbøjpädøjc-hajxy quiuiduñän,
jaduhñ hajxy waamb xquia'a nänøømämät. Pøn jaduhñ
mänaamb cooc tyjy quia'a hawiinmatsä coo tsu'uçh nd-
sú'tsämät, pues, hahixøøby jaduhñ coo mga'a tsú'udsät
coo hånajty mmøødhity. Hix, wehñdä miiçh jaduhñ
xpiadsú'udsät. Coo miiçh jaduhñ xjiaançh padsú'udsät,
cädiéeyäp je'eduhñ. ¹⁴ Cab jaduhñ quiädieeyä coo tsu'uçh
ndsú'tsämät, hoy hånajty tøø jia cunuu'xyii maa haboijt-
snaxy wyiinduumän. Nmøødhøçhä tøyhajt jaduhñ. Hix,
tu'ugmädiá'agyhøçhä Jesucristo nmøødhity, ja'a nWiind-
søñhájtbä. Pero jii jäya'ayhajxy näje'e miäna'añ cooc
tyjy quia'a hoyyä coo tsu'uçh ndsú'tsämät. Coo hajxy
jaduhñ jiaançh tsú'udsät, ja'a hajxy jaduhñ mänaambä,
pues, cädiéeyäp hajxy jaduhñ. ¹⁵ Hoorä, coo miiçhä
tsu'uçh jaduhñ mdsú'udsät, y coo jaaya'ay jaduhñ xpi-
ahíxät, ja'a jaduhñ mänaambä cooc tyjy quia'a hoyyä
coogä tsu'uçh mdsú'udsät, myajcädiéeyäp miiçh je'e-
duhñ. Pø jaançh tøy mdsocy, cab jaduhñ myajcädiéeyät,
je'eguiøxpä coo Diosmädia'agy miäböcy. Hix, ja'a Jesu-
cristo jaaya'ay tøø ñähho'tu'udy. Pero coo myajcädiéeyät,
wehñdä Jesucristo miädia'agy ñajtshixóyyäxät. ¹⁶ Y
coo jaaya'ay jaduhñ myajcädiéeyät, wehñdä miiçh mya-
jnänómät. Y wehñdä jaaya'ay yajnänøømbät, ja'a Jesu-
cristo miädia'agy tøø ñajtshixóyyäbä. Jaduhñds je'e,
maas hoy hit jaduhñ coo tsu'uçh mga'a nä'ägä tsú'udsät,

hoy jaduḥḥ mja najuø'øý coo jaduḥḥ quia'a cädieeyä coo mdsú'udsät. ¹⁷ Coo hajxy tøø nmäbøjcäm ja'a Jesucristocøxpä, paadiä Dios hajxy xyhanéhmänä. Hiḥ, cabä Dios waamb miäna'añ coo hajxy hotyijä ngaayy nhúucäm; ni jaduḥḥ quia'a mänaambä coo hajxy tii nga'a caayy nga'a húucämät. Coo Dios hajxy tøø xpiädäacäm hawa'adstuum, paady hajxy hoy njäya'ayhájtäm, paady hajxy jootcujc nnimiødhíjtäm, paadiä Dioshespíritu hajxy xyajxoonäacäm. ¹⁸ Hoorä, pønä Jesucristo miädia'agy jaduḥḥ cudiunáanäp, cumayáanäp je'e ja'a Diósäm møødä cú'ugäm. Tsøcxä hajxy jaduḥḥ cudiúunäm nebiä mäbøjpädøjc-hajxy quiudiuñän.

¹⁹ Mägu'ughajpädøjc, tsøgä hoybä hajxy tehngajnä høxtáayyäm, jaduḥḥ hajxy jootcujc nnimiødhíjtämät, jaduḥḥ hajxy hoy nniguiapxmøpøjcämät, jaduḥḥä Jesucristo miädia'agy hajxy hoy ngudiúunämät hamuumdu'joot. ²⁰⁻²¹ Cab jaduḥḥ quiädieeyä coo hajxy hotyijä ngaayy nhúucämät. Pero pø jii mäbøjpädøjc-hajxy jaduḥḥ näje'e miäna'añ cooc tyijy ja'a tsu'uçh hajxy nga'a tsú'tsämät, cooc tyijy ja'a vino hajxy nga'a húucämät, pues, maas hoy jaduḥḥ coo mga'a tsú'udsät, coo mga'a hú'ugät. Hiḥ, coo hajxy jaduḥḥ xyhíxät coo hánajty jaduḥḥ mgay mhu'ugy, wehndä hajxy jaduḥḥ xpiahíxät. Y coo hajxy jaduḥḥ xpiahíxät, cädieeyäp hajxy jaduḥḥ. Jaduḥḥ quiähxó'øgät coo miich hánajty tøø myajcädieey. Y cab jaduḥḥ yhooyä coo mäbøjpädøjc myajcädieeyät hoy ñä'a tiiguiøxpä. Hiḥ, jia wi'i pianøcxáanäbä Jesucristo miädia'agy hajxy jaduḥḥ, y coo hajxy jaduḥḥ quiädieeyät, cab hajxy jaduḥḥ hoy pianøcxät. ²² Hoy miich mja najuø'øý coo quia'a cädieeyä coo hotyijä mgay mhú'ugät, cab jaduḥḥ yhooyä coo wiinghänä'c mmøodyajtsibó'øwät. Ja'a Dios miich jaduḥḥ xyhijxp coo hoy mgudiuñ. Pøn jaduḥḥ najuøøby coo quiumayii

ja'a Diósäm nebiä quiuhdujthaty, jootcujc je'eduhñ yhity. ²³ Pero pøn jaduhñ ca'a najuøøby pø yejpiä Dios cuhdujt jaduhñ coo tsu'učh ndsú'tsämät, pø caj, coo je'e jiaančh tsú'udsät, cädiéeyäp je'eduhñ, hoy hamdsoo jaduhñ jia mäna'añ cooc tyijy ja'a Dios tøø miäna'añ coo hajxy nga'a tsú'tsämät. Paady jaduhñ miäna'añ, wehñdä tsu'učh hä-najty tøø quiunuu'xyii maa habojsnaxiä wyiinduumän. Jaaná jaduhñduhmbä, hoy ñä'a tiiguiøxpä, pøn jaduhñ ca'a najuøøby pø tøø Dios cuhdujt yecy je'eguiøxpä, o pø caj, coo jaduhñ jiaančh jatcø'øwät, cädiéeyäp jaduhmbä.

15

¹⁻² Nnajuøøyyäm højts jaduhñ coo quia'a cädieeyä coo hajxy hotyijä ngaayy nhúucämät. Pero tsögä nmägu'ughajpädøjc ja'a Diosmädia'agy jaac yajmábøjcäm, ja'a hajxy naamdägø'øy habøjpä, ja'a hajxy jaduhñ mänaambä cooc tyijy quia'a hawiinmatsä coogä tsu'učh ndsú'tsämät, coogä vino nhúucämät. Cabä nhamdsoo cuhdujthajtiä hajxy nyaghjítämät; møødä Dioscuhdujt hajxy nyaghjítämät. ³ Hiç, mänaa Jesucristo yaa yhitiän hädaa yaabä naaxwiin, cabä yhamdsoo cuhdujt hänajty yaghity. Ja'a Tieediä miädia'agy jaduhñ quiudiuunä, paady jaduhñ chaačhpøjcy. Jaduhñ jim myiñ cujaay maa Diosmädia'aguiän: “Pønjaty miičh haxøøg xñänøømb, jaduhñ mäwiin miäbaady néjjiäm høøch xñänøømbän”, nømä Jesucristo ja'a Tieedy ñämaayy. ⁴ Ja'a højtscøxpä Dios ja'a miädia'agy jecy yajcujahyyä, jaduhñ hajxy hoy ngapxtáacämät. Jaduhñ højtsä tøyhajt nmøødhjítäm coo Dios yajtøjiada'añ neby jecy yajcujahyyän coo højts jim xyajnøcxáanäm maa wyiinduumän. Coo hajxy jaduhñ nnajuøøyyäm coo hajxy jim nnøcxáanäm, paady hajxy hotyijä nmee'xtújcämät. Cab hajxy tsøc jootmayhjtäm, hoy hajxy cøxypänejpiä

cu nja jajt cu nja habéjtäm. ⁵ Ja'a Dios hajxy jaduñ xpiuhbéjtäm coo hajxy jaduñ nmee'xtújcämät, coo hajxy jaduñ nga'a jootmayhájtämät. Ween mijtsä Dios xpiuhbety coo hajxy jaduñ mbahíxät nebiä Jesucristo hoy yhitiän. Jootcuyc hajxy jaduñ mnimiøødhidóøjät tu'ugmädia'agy. ⁶ Jaduñ hajxy tu'ugmädia'agy mhídät coo Dios hajxy mgapxpáadät møj jaančh. Ja'a Dios, ja'a Jesucristo Tieedy je'e. Ja'a Jesucristo hajxy nWiindsøñhájtäm.

⁷ Hoorä, nebiä Jesucristo hajxy xchójcäm, jaanä jaduñ hajxy hamuumdu'joot nničhójcämbät. Coo cu'ug hajxy jaduñ xyhíxämät coo hajxy hánajty nničhójcäm, jaduñä cu'ughajxy ñajuø'øwaambä coo Dios miøjjä jiaančhä. ⁸ Jéquiänä Dios jaduñ miänaañ coogä yajnähwaats yajcuhwaatspä quiexa'añ maa judíoshajxiän. Ja'a judíos ja'a yhapä tieedy hajxy, je'eds hajxy jaduñ jecy hawáañäxä, møødä Abraham, møødä Isaac, møødä Jacob. Coo Jesucristo yaa quiejxä hädaa yaabä naaxwiin, hoyyä judíoshajxy piuhbedyii. Tøjiajt jaduñ nebiä Dios jecy miänaañän coo yajnähwaats yajcuhwaatspä hánajty quiexa'añ. Hiç, tømiädiaacpä Dios. Caj mänaa yhøñda'agy. Tøyhajt jaduñ. ⁹ Jaanä jaduñduhmbä, paadiä Jesucristo yaa quiejxä, hoyyä jäya'ayhajxy piuhbéjtäbä, ja'a hajxy ca'a judíospä. Coo hajxy jaduñ näxúu'tsäbä ja'a Diósäm, paadiä Dios hajxy møj jaančh quiapxpaady. Jaduñ jim myiñ cujaay maa Diosmädia'aguiän: Miičh ngapxpaadaamby møj jaančh näguipxy møød hajxy ca'a judíospä.

Høyháamhøch miičh nwiingudsähgø'øwa'añ, nømä Dios ñämaayyä. ¹⁰ Wiingtuumä Diosmädia'agy myiingumbä cujaay: Mijts ca'a judíospä, xoonäda'ag hajxy møødä Dios quiu'ughajxy näguipxy.

¹¹ Jaduhñ cujaay myíngumbä wiingtuum:
Mijts ca'a judíospä, weenä Dios hajxy møj jaančh mgapx-
paady wiinduhmyhagajpt.

¹² Wiingtuumä Isaías jecy quiujáhguiumbä:
Ja'a Isaí yhapä yhoc, minaamb je'e miähane'ema'añ.
Ja'a jäya'ayhajxy ca'a judíospä, je'eds hajxy jaduhñ
hane'emáañäp.

Jaaya'ay hajxy jaduhñ jìøbhijxyp coo hajxy min̄ yajnäh-
wa'ads yajcuhwa'adsa'añii,
nømä Jesucristo jecy ñänøømä, møødä jäya'ayhajxy ca'a
judíospä.

¹³ Hoorä mijts, coo Diosmädia'agy hajxy tøø mmäbøcy,
weenä Dios hajxy hoyhoy xyajxoonda'agy, ween hajxy
xyaghity jootcujc. Hiñ, tøø Dios hajxy xyhawáañäm coogä
hoyhajtä weenhajt hajxy xmio'owáañäm ca'xy pedyii.
Hamuumdu'joot hajxy jaduhñ mjøbhíxät. Xpiuhbédäbä
Dioshespíritu hajxy jaduhñ ja'a miäjaahaam.

¹⁴ Mägu'ughajpädøjc, nmøødhøchä tøyhajt jaduhñ coo
hajxy hamuumdu'joot mničhocy mnibia'häyoyii, møød
coo hojiot hajxy mmøødä, møød coo Diosmädia'agy
hajxy hoy mwiinjuø'øy, møød coo hajxy mjaty mägapx
hane'em. ¹⁵⁻¹⁶ Nébiøch hädaa nocy cham̄ ngujaayän,
hamøc hadsaačh mijts tøø nmägapxy tøø nhane'emy.
Nyagjahmiejchp mijts jaduhñ jadähooc. Nmøødhøchä
cuhdujt jaduhñ coočh mijts nyagjahmiédsät. Hiñ, ja'a
Dióshøch jaduhñ tøø xtiuungmo'oy coočhä miädia'agy
nyajwá'xät ja'a Jesucristocøxpä jim̄ maa mijtsän, mä-
duhñtiä hajxy mga'a judíoshaty. Coo jäya'ayhajxy nämay
miäbøgät hamuumdu'joot ja'a Dioshespíritu miäjaahaam,
mänit hajxy quiumaya'añii ja'a Diósäm.

¹⁷ Jootcújc-høch jaduhñ nnijwiø'øyii coočhä nduung
tøø yhoyø'øy, ja'a Dióshøch tøø xmió'oyäbä. Ja'a
Jesucristøch jaduhñ xpiuhbejp, páadyhøch nduung

tøø yhooyø'y. ¹⁸ Jayóoyyøch cham̄ nmädia'aga'añ nebiátyhøchä Jesucristo xpiuhbejty mänáabøchä jäya'ay ja'a Diosmädia'agy nyajmäbøquiän, ja'a hajxy ca'a judíospä. Cábøch nmädia'aga'añ nebiatiä wiinghäna'c-hajxy tøø tiuñ. Mädia'agyháamhøchä jaaya'ay nyajmäbøjcy, møød coochä hoy-yagjuøøñäbä hänäjty nyajcähxø'øgy. ¹⁹ Ja'a Dios, ja'a miäjaahaamä hijxtahnd tøø yajcähxø'øgy hoy-yagjuøøñä. Ja'a yhEspirituhaamä jäya'ay tøø yajmäbøcy. Wiinduhmyhagájpthøchä Diosmädia'agy hoy nyajwa'xy ja'a Jesucristocøxpä, coo jaaya'ay hajxy hoy xñähho'túutäm. Jímhøch ndägøoyy wädijpä Jerusalén. Jäguémhøch hoy nwädity. Høxtä jímhøch hoy nwädity maa naax xiøhatiän Iliria. ²⁰ Jayóoyyøch jim̄ tøø nwädity majatiä Jesucristo hänäjty tøø quia'a mädoyhadyiijän. Jadúhnhøch nnä'ägä wädityhaty. Hix, cábøchä Dios xtiuungmooyy cooch nwädítät maa wiinghäna'cä Diosmädia'agy hänäjty tøø yajwa'xiän. ²¹ Pønjatiä Diosmädia'agy tøø quia'a mädoy, je'ech tøø nyajwiingapxø'øy. Jaduhñ jim̄ myiñ cujaay jaaya'aguiøxpä maa Diosmädia'aguiän, ja'a hänäjty cahnä miädoybä:

Pønjaty ca'a mädoobnä coo Dios ja'a yajnähwaatspä tøø quiexy, je'edshajxy jaduhñ mädoyhadaamb.

Ja'a jäya'ayä Diosmädia'agy hajxy hijty ca'a mädoobnä, jaduhñ hajxy yajmøødmädia'aga'añii coo hajxy ñäxuüchii ja'a Diósäm.

²² Tøøch jim̄ mayhooc nja nøcxa'añ maa mijtsän jim̄ Roma. Pero cábøch hijty xñäbaadøyyä cooch jim̄ nnøcxät. Hix, ja'a Diosmädiá'agyhøch hijty nyajwa'xyp wiinduhmyhagajpt. ²³ Pero tøøch nwädijpædøøñä wiinduhmyhagajpt. Mobädájpnøch jim̄ nnøcxaannä maa mijtsän. Tøø jaduhñ majiomøjt yhijnä cooch jim̄ tøø nja

wi'i ñøcxa'añ maa mijtsän. ²⁴ Cooch mäbøcy hänajty jim̄ nnøcxa'añ España, mänítøch mäbøcy jim̄ ndu'unaxó'øwät maa mijtsän. Jootcújc-høch jaduññ nnijwiø'øwøójät cooçh mijts jaduññ nguhíxät. Mänítøch njaac tu'uyó'oyät cooçh hänajty jim̄ nnøcxa'añ España. Mänítäts mijts hii xpiuhbédat. ²⁵⁻²⁶ Pero cab jaduññ choj näbaadø'øwa'añ cooçh jim̄ nnøcxät maa mijtsän. Hix̄, Jerusalénhøch jayøjp nnøcxa'añ. Xädø'øñhøch jim̄ nøcxy nyega'añ. Ja'a häyoobädøjc-høch nøcxy nmo'owa'añ, ja'a hajxy mäbøjpä. Ja'a mäbøjpädøjc-hajxy jim̄ tsänaabiä Macedonia møød jim̄ Acaya, jaaya'ayä xädø'øñ hajxy yajmujc. Høøçhä xädø'øñ hajxy xyajmäguexaamb cooçh hänajty jim̄ nnøcxa'añ Jerusalén. ²⁷ Hamdsoojoot hajxy yajmujcy, ca'a yhøøçhä nnämaayy coo hajxy yajmúgät. Hawiinmats jaduññ coo mäbøjpädøjc-hajxy piuhbedøójät, ja'a hajxy jim̄ tsänaabiä Jerusalén. Hix̄, judíoshajp hajxy je'e. Jaaya'ayä Diosmädia'agy hajxy jim̄ mäbøjtsohñ Jerusalén mänaabä Diosmädia'agy tiägø'øyän wädiipä ja'a Jesucristocøxpä. Mänitä jäya'ayhajxy høx̄haam jiaac mädoyhajty, ja'a hajxy ca'a judíospä. Miäbøjc hajxy je'ebä. Paady jaduññ yhawiinmatsä coo ja'a judíoshajxy piuhbedøójät ja'a jäya'ayhájxiäm, ja'a hajxy ca'a judíospä. ²⁸ Hoorä, cooçhä xädø'øñ hänajty jim̄ hoy tøø nyecy Jerusalén, mänítøch mäbøcy jim̄ nnøcxa'añ España. Mänítøch jim̄ ndu'unaxó'øwät maa mijtsän jim̄ Roma. ²⁹ Y cooçh jim̄ nmédsät maa mijtsän, nägø'ø nädécypiøçhä Jesucristo xpiuhbeda'añ cooçh mijtsä Diosmädia'agy nyajnahixó'øwät, jaduññ hajxy tu'ugmucy nhíjtämät jootcujc. Nmøødhøçhä tøyhajt jaduññ.

³⁰ Mägu'ughajpädøjc, tu'ugmädia'aguiä Jesucristo hajxy nmøødhíjtämbä, ja'a hajxy nWiindsøn'hájtäm. Ja'a Dioshespíritu hajxy xyajniçhójcäm. Huuc tunä mayhajt hajxy maaçh høøçhcøxpän. Tsøgä Dios hajxy hamuum-

du'joot mänuu'xtáacäm maačh hөөчcөxpän ³¹ coočhä Dios jim xñäwá'anät Judeanaaxooty maa jäya'ayhajxy ca'a mäbөjпän. Jaduhnä Dios hajxy nmänuu'xtáacämbät coočhä mäbөjпädөjc-hajxy jim jootcujc xtiөjmó'owät jim Jerusalén coočh jim nmédsät xädø'øñyejpä. ³² Y coo Dios jaduһn miäná'anät, mänítөch jim nwiimbídät, mänítөch jim jootcujc nnөcxät maa mijtsän. Jootcújc-hөch jaduһn jim nbóo'xät. Hamiñ haxөpy hajxy mänit nnijoot-capxmөcpөjcämät. ³³ Xmióoyyämä Dios ja'a hoyhajtä weenhajt hajxy. Wéenäts mijts nägөxiä xpiuhbety.

16

¹ Jímhөчhä nmägu'ughajpä tu'ug chäna'ay maa cajpt xiөhatiän Cencrea. Febe xiөhaty. Diosmädia'agymiäbөjп je'ebä. To'oxiөjc je'eduhн. Mäbuhbejп jaduһn maa tsajtөjcän. ² Coo Febe jim miédsät maa mijtsän, naxy hajxy jootcujc mdehн miägu'ugpөgät ja'a Jesucristocөxpä. Hawiinmats coo hajxy jaduһn mmägu'ugpөgät pөnjatiä Diosmädia'agy mäbөjп. Mmó'owäbä Febe hajxy jaduһn tijaty yajmaajijpy. Hiх, náxyhөch jaduһn xpiuhbety. Nämay hajxy jaduһn tøø piuhbedyii.

³ Nyajpóo'xypөчhä Prisca mөөdä Aquila. Tөөчh hajxy jaduһn xmiөөdtuñ ja'a Jesucristocөxpä. ⁴ Tөөчh hajxy jaduһn jim xñäwa'añ mäjahñdiuum. Páadyhөчhä Dioscujú'uyäp nmo'oy. Jaduhnä mäbөjпädөjcä Dioscujú'uyäp hajxy yejpä, ja'a hajxy ca'a judiөspä, wiinduhmьhagajpt. ⁵ Móөdhөчhä jäya'ay jaduһn nyajpoo'xpä, pөnjaty jaduһn hamugөөby Dioswiingudsähgөөbiä maa Prisca tiөjc-hajxiän. Móөdhөчhä Epeneto nyajpoo'xpä. Jaančh tehн yhóyhөch je'eduhн xmiägu'ughaty. Jaayá'ayäts jim mäbөjtsoһn ja'a Jesucristocөxpä maa naax jaduһn xiөhatiän Asia. ⁶ Nyajpóo'xypөчhä Mariábä. Jaančh tehн yhoy jim tiuñ maa mijtsän. ⁷ Nyajpóo'xypөчhä

Andrónico mөөдä Junias. Hөөчһ nmägunaaxhajxy je'e. Näguípxyhөch hajxy hijty xmiөөdtsumyчһana'ay. Hoy piөnä jaduhñ ñajuө'өy coo hajxy Dyiosquexiä. Paady hajxy jaduhñ quiejxä, coo Diosmädia'agy hajxy jaduhñ yajwá'xät. Jayөjp hajxy miäbөjcy ja'a Jesucristocөxpä. Hөөчһ hөxһaam njaac mäbөjc.

⁸ Nyajpóo'xypөчһä Ampliato. Hөyhөch je'e xmiөөdnijiootpaadyii ja'a Jesucristocөxpä, ja'a hajxy nWiindsөñhájätäm. ⁹ Nyajpóo'xypөчһä Urbano. Näguipxy hajxy je'e xmiөөdtuunäm ja'a Jesucristocөxpä. Nyajpóo'xypөчһä Estaquis. Hөyhөch je'eduhñ xmiägu'ughaty. ¹⁰ Nyajpóo'xypөчһä Apeles. Tөө jiaanчһ tehñ miee'xtucy ja'a Jesucristocөxpä. Nyajpóo'xypөch pөnjaty jaduhñ jim tsänaaby maa Aristóbulo tiөjcän, ja'a hajxy mäbөjpä. ¹¹ Nyajpóo'xypөчһä Herodiön. Hөөчһ nmägunaax je'ebä. Nyajpóo'xypөch pөnjaty jaduhñ jim tsänaaby maa Narciso tiөjcän, ja'a hajxy mäbөjpä. ¹² Nyajpóo'xypөчһä Trifena mөөдä Trifosa. Tuumb hajxy jaduhñ ja'a Jesucristocөxpä, ja'a hajxy nWiindsөñhájätämbä. Nyajpóo'xypөчһä Pérsida. Jaanчһ tehñ chөjcäp je'e. Hoy jiaanчһ tehñ tiuumbä maa Jesucristocөxpän. ¹³ Nyajpóo'xypөчһä Rufo mөөдä tiaj. Jaanчһ tehñ yhooyä Rufo ja'a Jesucristo miädia'agy pianөcxä. Jadúññhөчһä tiaj njuөөyyä nébiөch nhamdsoo tajján. ¹⁴ Nyajpóo'xypөчһä Asíncrito, mөөдä Flegonte, mөөдä Hermas, mөөдä Patrobas, mөөдä Hermes, mөөдä mäbөjpädөjc jaac jimbä. ¹⁵ Nyajpóo'xypөчһä Filólogo, mөөдä Julia, mөөдä Nereo mөөдä piuhdo'oxy, mөөдä Olimpas, mөөдä Diosmädia'agymiäbөjpähajxy jaac jimbä.

¹⁶ Xi'ig xon hajxy mniyajpoo'xөөjät ja'a Jesucristocөxpä. Xyajpoo'xp mijtspä, ja'a hajxy mäbөjpä ja'a Jesucristocөxpä wiinduhmyhagajpt.

¹⁷ Mägu'ughajpädөjc, jii jäya'ayhajxy näje'e wiädity,

wiing hajxy yajnä18 Hix, cabä Diosmädia'agy hajxy yajnä19 Hopiønä tøø miädoyhaty coo mijtsä Diosmädia'agy hamuumdu'joot mmäböcy ja'a Jesucristocøxpä; páadyhöch jootcujc mnijiäwø'yii ja'a mijtsøxpä. Jaduhñ mijts nyajmädsocy coo hajxy mniyajcopcø'øwóøjät, jaduhñ hajxy hoy mwädítät, jaduhñ hajxy haxøøg mga'a jäya'ayhádät. ²⁰ Ja'a Dios hajxy xyaghidaamb jootcujc. Coö hajxy mga'a möjpädá'agät waambatiä höhndaacpä hajxy xjia wi'i yajnä

²¹ Xyajpoo'xp mijtsä Timoteo. Hööch jaduhñ xmiøød-tuumb. Jaanä xyajpoo'xp mijts jaduhñ ja'a Lúciobä, møødä Jasón, møødä Sosípater. Haagä hööch nmägunaaħhajxy je'e.

²² Hööch Tercio, hööch hädaa nocy ngujahby. Jaanä hööch mijts nyajpoo'xpä ja'a Jesucristocøxpä.

²³ Xyajpoo'xp mijtsä Gayo. Yaač jaduhñ nhity ja'a Gayo tiøgooty. Yejpiä tiøjc jaduhñ coo mäböjpädøjc-hajxy

yaa yhamugó'owät Dioswiingudsähgøøbiä. Xyajpoo'xp mijtsä Erasto. Jim je'e tiuñ hagujc. Xädø'øñgwieendähajp jim. Møødä hermano Cuarto hajxy xyajpoo'xpä.

²⁴ Ween mijtsä Jesucristo ja'a hoyhajtä weenhajt xmio'oy nägøxiä. Amén.

²⁵ Hoorä, tsögä Dios hajxy mõj jaanč capxpáatäm. Jaaya'ay mijts hamuumdu'joot xjiaac yajmábógäp ja'a Jesucristocøxpä. Jadúhñhøch nnä'ägä yajnáhixø'øyhaty coo Dios ja'a Jesucristo quiejxy. Jaduhñä Jesucristo hajxy hoy xyajnáhwáatsäm nägøxiä, møødä judíoshajxy, näguipxy møødä ca'a judíoshajxypä. Tøyhajt jaduhñ. Jéquiänä Dios jaduhñ wyiinmaayy, pero cab jaduhñ choj yajtøjiajty. Paady hajxy nga'a tsoj wiinjuóøyyäm. ²⁶ Pero jim jaduhñ myiñ cujaay maa Diosquexyhajxy jecy quiujahyyän. Jim jaduhñ cøxiä quiapxtøy. Naamnä hajxy jaduhñ tøø nwiinjuóøyyäm. Paadiä Dios jaduhñ yhanehmnä coo mädia'agy ja'a Jesucristocøxpä wiá'xät wiinduhmyhagajpt, jaduhñä jáya'ayhajxy nägøxiä miábógät, jaduhñ hajxy quiudiúumbät. Homiänaajä Dios yhity.

²⁷ Jagooyyä Dios tøø wyiinmay coo hajxy xyajnáhwáatsäm, coo hoyhajtä weenhajt hajxy xmióøyyäm. Ja'a Jesucristocøxpä Dios mõj jaanč quiapxpaadyii cøjxta'axiøø. Amén.

El Nuevo Testamento en mixe de Guichicovi **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
